


廣東通志

ル 5
1508
10





門	ル	呂	6
番	1308		
表	10		



門	ル	5
番	1508	
表	10	

廣東通志卷之二十一

郡縣志八

廣州府

名宦

漢制守令最為近民所繇以勤宣德意朝施而暮
 暨焉天子亦以為與我共理天下至顧列屏石對
 慰勞真若登閭閻隱伏而親睹其狀者我朝析
 置郡縣令得一意拊循不至雜治意猶深厚吾廣
 越在荒服澤易阻于幽遐故旦夕德音怙恃彌切

每聞詔一守一令輒延頸企踵曰庶幾生我乎夫
民勞則思見德不待汪湛而得我易也廣州劇郡
視外輔加難繇此多羸尪之子矣爲民父母親若
免諸懷左提而右擎之如恐不勝故速於袞焚而
不後於拯墜亦何暇計其上信而下獲之也嗟乎
歷九折者必良驥齒盤錯者必鈇外理痼瘵者必
循良余因歷術吳恢以下清聲熒政照耀圖牒者
若而人毋曰漢多良吏吾廣不數數見迄今廉者
節耗平者斷獄敏與慎者剔蠹而集事故上所不
及褒者民頌之民所不及祀者志載之語曰前車
之不忘後事之師也志名宦

漢吳恢陳留人順帝時爲南海太守欲殺青簡以寫
經書子祐年十二隨官諫曰大人踰越五嶺遠在海
濱多珍異國家猜疑權威覬望此書若成則載之兼
兩昔馬援以薏苡興謗王陽以衣囊徼名嫌疑之間
先賢所謹恢乃止撫祐背曰我家不乏季子矣恢臨
政慎謚以清白著聲祐後爲河間相生二子鳳愷及
孫駕皆仕宦有名於世

黃演字元長荊州江陵人少有至性父母病輒不飲食病止復故章帝章和中舉孝廉仕番禺令涖政廉平鎮寧不擾吏民安之

孔嵩字仲山南陽人少遊太學有高節歷官南海太守在郡清白糲食如貧賤時士民敬之

三國呂岱字定公海陵人吳安南將軍都鄉侯也孫權時交趾太守士燮子徽叛據交州岱乃表分海南

三郡為交州以將軍戴良為刺史海東四郡為廣州
岱為刺史共擊徽大破之進封番禺侯詳省會志

鍾離牧字子幹會稽山陰人吳大帝赤烏五年遷南海太守時高涼越率仍弩等破畧殘害越界撲討旬

日降服又揭陽賊率曾夏等數千人叛歷十餘年以侯爵雜繒下令購募不可得牧遣使慰譬之皆首服

自改為良民始興太守羊銜與書太常滕胤稱其恩威智勇操行清純有古人風

吳展字士季下邳人舉孝廉仕至廣州刺史為政清平不尚嚴威南嶠蔡洪稱其清足勵俗信可結神才

堪幹世時以為知言

虞授餘姚人永安中仕至廣州刺史軫恤災旱申理幽滯廣民愛之行部所至密擒寇賊勸相農桑闔境大治三年代去後南土盜發天紀末復用授爲廣州都督居嘗以馬革裹屍自許及郭馬作亂授竟死於難人以爲讖云子基右軍司馬孫球黃門侍郎

六朝袁宏字彥伯夏陽人有逸才晉哀帝時爲南海太守表章行誼大興風教漢徵士番禺董正學行著在南土宏奏旌其門嘗登羅浮紀事作疏多所著述終東陽太守三子皆知名

王毅長沙人晉武帝時以學行被州郡辟仕至蒼梧太守惠帝元康中遷平越中郎將廣州刺史在位甚得民情朝政方亂嶺表賴毅以安永興二年卒于廣州子矩爲南平內史有討庾冰陳敏功亦授廣州刺史美姿容每出觀者盈路在州月餘以勞瘁卒

諸葛京字行宗瑯琊陽都人漢丞相亮之孫魏人滅漢京父瞻戰死咸熙初徙其家河東晉武帝泰始中詔曰諸葛亮在蜀盡其心力其子瞻臨難而死義天下之善一也其孫京隨才署吏後爲郿令尚書僕射

山濤薦之擢中庶子惠帝時位至平越中郎將廣州刺史假節推誠待物有祖風烈吏民稱之

滕含西鄂人前刺史脩之子初爲庾冰輕車長史討蘇峻有功封夏陽縣開國侯邑千六百戶授平南將軍廣州刺史在任積年甚有威惠世濟其美廣人稱之會林邑陷日南攻九真征西督護滕峻率交廣之兵往禦反爲所敗升平末含率衆伐之林邑王范佛懼請降含與盟而還卒謚曰戴

陶侃字士行以荊州刺史討平杜弢王敦忌其功左遷廣州刺史平越中郎將時王機據廣州侃至遣兵斬機一方賴之以功封柴桑侯嘗語人曰大禹聖者乃惜寸陰至於衆人當惜分陰豈可逸遊荒醉生無益於時死無聞於後是自棄也侃在州朝運百甓於齋外暮運於齋內人問其故答曰吾方致力中原豈可過自優逸其勤勵類此交州刺史王諒爲賊梁碩所陷侃遣將高寶進擊平之進號征南大將軍開府儀同三司王敦反侃復遣將高寶致討及敦平遷都督荆雍等八州諸軍事荊州刺史交廣并領焉楚郢

士女莫不相慶後都督江州敗石勒將平襄陽拜大將軍太尉卒年七十六謚曰桓

謝奉字弘道山陰人歷安南將軍廣州刺史爲政清靜不煩徵爲吏部尚書後免官東還道逢謝安共語三日安欲慰其失官奉輒引以他事安嘆曰謝奉故是奇士

羅友襄陽人刺廣州在藩政舉大綱不存小察吏民安之有大韻好遊觀嘗疊石以玩簾泉七月中旬倡爲遨頭與民同樂後改益州卒

吳隱之字處默濮陽甄城人元興元年爲龍驤將軍廣州刺史行次貪泉酌而飲之賦詩曰古人云此水一飲懷千金試使夷齊飲終當不易心及涖州清操踰常食不過菜乾魚而已帷帳器服皆附外庫時人頗謂其矯然始終不易元慶初下詔褒賞及盧循陷南海長子曠之戰沒隱之爲循所得囚之表請加戮詔不許劉裕與循書令遣隱之還久方得反歸舟之日裝無餘貲其妻劉氏齋沉香一斤隱之索而投諸湖亭之水今有沉香浦及至家居數畝小宅籬垣交

陋内外茅屋六間僅容妻子尋拜度支尚書後遷中
領軍每月初得祿裁留身糧其餘悉分給親族義熙
八年知劉裕有慕立之志遂請老詔許之九年卒子
延之復厲清操爲鄱陽太守

劉謙之彭城呂人初爲始興相義熙末東海人徐道
期流寓廣州無士行爲僞舊所陵侮因刺史謝欣死
合率群不逞之徒作亂攻沒州城殺士庶素憾者百
餘謙之帥師破之遂復廣州誅其黨與仍行州事卽
以爲振威將軍廣州刺史

王鎮之字伯重瑯琊臨沂人世著宦績鎮之初爲瑯
琊王叅軍出爲令守在官清絜義熙末遷御史中丞
執政不撓百僚憚之出爲建威將軍平越中郎將廣
州刺史加都督劉裕謂人曰鎮之少著清績必將繼
美吳隱之嶺南之弊非此子不康也在鎮果不受祿
俸蕭然無營去官之日不異初至裕初建相國府爲
諮議叅軍遷宋臺祠部尚書及裕篡晉以脚患自陳
出爲瑯琊太守永初三年卒

王琨瑯琊臨沂人孝建中爲建威將軍平越中郎將

廣州刺史南土沃實官此者常致巨富琨無所取納表獻祿俸之半州鎮舊有鼓吹又啓輸還人服清操謂隱之不能過及罷任孝武知其清慰問甚至官至光祿大夫

羊希字泰聞太山南城人少有才氣爲尚書左丞泰始三年爲寧朔將軍廣州刺史四年希以沛郡劉思道行晉康太守領軍伐俚思道違節失利希遣收之思道不受命率所領襲州希遂遇害

閔康之河東人注意墳籍四十年不出門不應徵辟宋泰始中以母老家貧始就懷化令在任清約不通賓客得俸奉母滿考而去其精左氏學爲世所稱陸展吳郡人徽之弟少善詞章嘗撰世說新語人競傳之宋元嘉中爲增城令歷南海太守務持體要不爲苛細士民安之後改守尋陽

蕭勵字文約南蘭陵人梁武帝之從子也喜愠不形於色位太子洗馬歷豫章內史徙廣州刺史廣州邊海舊饒外國舶至多爲刺史所侵及勵纖毫不犯舶歲十餘至俚人爲暴勵征討所獲軍賞之外悉送臺

前後刺史皆營私畜方物之貢少登天府自勵在州歲中數獻軍國所須相繼不絕武帝嘆曰朝廷自是有廣州詔以本號還朝而西江俚帥陳文徹出寇高要又詔勵復任防禦招徠克殫智力勵以南江危險宜立重鎮乃表於臺行之以績最徵爲太子左衛卒勵性儉約而器度寬裕左右嘗將羨至當習翻之顏色不異徐呼更衣人服雅量性耽儒素聚書至萬卷披翫不倦尤好東觀漢記畧皆誦憶劉顯執卷策勵酬應如流乃至卷次行數亦不差失結交唯與何子野范陽張纘善卒贈侍中謚曰光侯

蘭欽字休明中昌魏人有謀畧勇決善戰步行日二百里善於撫馭得人死力梁天監中征南中五郡諸洞反者所至皆平以功累封安懷侯後平梁漢改授都督衡州刺史經廣州因破俚帥陳文徹兄弟禽之至衡州進號平南將軍改封曲江縣公在州有惠政吏人詣闕請立碑頌德詔許焉後爲廣州刺史前刺史新渝侯卒南安侯恬權行州事冀得即真及聞欽至嶺遣人毒殺之帝聞大怒檻車收恬欽子夏禮侯

廣東通志 卷之二十一 三十五
景至歷陽率其部曲邀景兵敗死之

王長述京兆霸城人授司憲大夫拜廣州刺史甚有威惠吏人懷之在任數年蠻夷咸服歸者三萬餘戶朝議嘉之拜大將軍後歷襄仁二州總管並有名後數歲以行軍總管擊南寧未至道病卒贈上柱國冀州刺史

陸法真吳郡人宋大明中爲劉秀之安北錄事參軍持身廉介老而益堅羊希嘗薦于孫詵以東南名士稱之恭始初爲南海太守時廣州部將李萬周以南海督護兵作逆殺刺史袁曇遠將有異圖法真保障民庶鎮靜不擾郡境賴之竟以勞悴卒于官

到道武源人宋元徽中爲寧遠將軍輔國長史南海太守在郡嚴公有威刺史陳顯達出令道不苟從後以力諫見殺道家人在都從野夜歸見三人持聖刷其家須臾滅明日而道凶問至

謝昌寓陳郡人宋昇平末爲劉悛廣州參軍性至孝珍品非父母先不敢食其俸給供養之餘輒施予之嘗養一鵠昌寓病二旬鵠二旬不食比卒鵠遂飛去

廣人異之

王僧孺東海郟人也仕南齊爲南海太守俗殺牛無忌孺下令禁之又夷珍土產海舶歲至貿易州郡利之孺歎曰昔人爲蜀長史終身無蜀物吾豈以越裝遺子孫並無所取視事朞月有詔徵還郡民詣闕請留不許旣至拜中書郎領著作

裴政字德表河東聞喜人梁承聖中爲廣州長史時魏遣于謹帥師伐梁廣州刺史王琳遣兵入援次長沙政請開道先報江陵至百里爲魏人所獲梁王啓時叛與魏合陰有自立之志謂政曰我武帝孫也不可爲爾君乎若從我計貴及子孫不然腰領分矣政詭曰唯命誓鎖之至城下命言曰僧辨已自爲帝王琳不復能來政大言曰援兵漸至各思自勉誓怒欲殺之叅軍蔡大業諫曰此民望也殺之則荊州不可下矣乃釋之魏人克江陵政入于魏後仕周

孫瑒字德璉吳郡人祖文惠齊越騎校尉清遠太守瑒少倜儻好謀畧博涉經史尤便書翰始爲衡州平南府司馬破黃洞蠻賊有功除東莞太守行廣州刺

史在州能理民夷懷之後為五兵尚書領右軍將軍
侍中如故禎明元年卒于官謚曰桓子後主題銘後

四十字

詞曰秋風動竹烟水驚波幾人樵徑何處山阿今時日月宿昔烟蘿天長路遠地久雲多

功臣未勒到此如何時論以為榮場二十一子咸有父風

周文育字景德羨陽人多智畧精騎射征討積功梁
大同中除南海令勸課百姓有循良風邑多盜縱橫
海上聞文育威名無敢竊發者累官都督江衡交廣
諸軍事

毛爽榮陽人躬耕力學持已端潔仕陳為陽山太守

郡雜夷獠難治爽禁與貿易爭掠遂息隋人南侵勒
兵往援會建康陷沒而隋桂州總管周法尚帥大軍
臨境爽以衆寡不敵集士民縞素北向慟哭遂以郡
屬法尚隋官之不受歸家窮究律呂之學著書傳于
世

皇甫誕字玄憲安定朝那人起家長史歷周畢二府
隋開皇中轉廣州長史悅近來遠伐叛懷柔雕題緩
耳咸漸其化後除益州總管司法

侯莫陳穎字遵道代人隋大業中拜桂州總管七十

州諸軍事大崇恩信民夷悅服後徵歸京師嶺南閩
越多不附帝以穎前在桂林有惠政爲南土所信服
復拜南海太守後四歲卒

劉權字世界彭城豐人隋大業中爲南海太守行至
鄱陽會群盜起不得進詔令權召募討之權率兵與
盜遇不與戰先乘單舸詣賊營說以利害群賊感悅
一時降附帝聞而嘉之旣至南海甚有異政歲遇群
盜蜂起來攻郡城權盡力固守以拒之子世徹又密
遣人齎書詣權稱四方恒擾英雄並起時不可失諷
令舉兵權召集佐僚對斬其使竟無異圖守之以死
卒于官時年七十

唐王峻滄洲景城人徙洛陽歷仕殿中侍御史永徽
初出刺連州有智畧善于撫馭民徭安之景隆末轉
桂州都督劉幽求放封州廣州都督周利貞希武三
思旨欲殺之道出峻所峻知其故留不遣利貞移書
趣幽求峻營救得免由是名益起累遷至同中書門
下三品終唐之世刺連州爲名相者峻一人而已
張九章曲江人丞相九齡弟開元中爲南海令多惠

政好爲民興利戶口日增累遷桂陽長史以母憂去
毀不勝衣哀慕三年起歷嶺南經畧節度使政聲益
隆改義王府長史嘗奉命封南海神爲廣利王碑刻
至今尚存

劉禹錫字夢得中山人永貞元年坐王叔文黨貶連
州刺史未至斥朗州司馬十年不調執政憐其才召
還尋以玄都觀詩譏忿復出爲播州刺史從中丞裴
度請移連州禹錫負才憤廢偃蹇寡合惟以詞章自
適而郡中文學日興論者多其振作之功

蔣防字子微南興人年十八時父令作秋河賦援筆
立就長慶四年由尚書司封郎遷翰林學士知制誥
得罪出守臨汀寶曆二年改連州刺史有惠政常疏
楞伽峽水民便之著述甚富今福山碑飛沐亭銘尚
存

王仲舒字弘中并州人少孤貧事母以孝聞貞元十
年舉賢良方正拜左拾遺帝欲相裴延齡仲舒與陽
城交章極言不可十三年以吏部員外郎謫連州司
戶叅軍在官如在家政暇關北山地爲燕喜亭韓愈

爲之記後歷中書舍人出爲江西觀察使嘗出官錢
二萬貫代貧戶輸稅民感其德

韓愈字退之鄧州南陽人貞元十九年以四門博士
拜監察御史時關中旱饑京兆尹李實催科益急愈
力陳其非宜德宗怒貶陽山令教民以詩禮風俗丕
變惠愛在民民生子多以其姓字之暇日讀書縣齋
與區冊輩偕遊順宗卽位大赦遷者徵還獨愈爲觀
察使所抑久之始改江陵法曹叅軍

張祐字承吉清河人工辭曲晚窺建安風格一時賢

後多與之遊或薦于朝書奏不下受辟諸侯府循介
鮮容輒自劾去後知南海廉潔自持一介不取朞月
間解職惟載羅浮石筍還平生不治產沒後子孫幾
不自給溫庭筠經其故居作詩悼之有丹陽集行于
世

宋董樞元氏人爲周殿中侍御史劍州判官時李師
之黨攻劍州樞引兵擊敗之招降數百人宋乾德初
遷主客員外郎嘗上書請平吳伐蜀及取廣南開寶
三年上令樞率兵攻劉鋹趨連口敗之廣南平改兵

部郎中權知連州兼招撫使時當亂離連人保室家
樞之力也暮年代去終判御史臺

李惟清字直臣下邑人開寶中以三史解褐歷衛尉
少卿出知廣州謹敕不苛玆貨一無所取至道初就
拜右諫議大夫太宗以蕪平詔獎之二年徙廣南東
西路都轉運使召拜給事中終御史中丞卒

孔勗交州人孔子四十四代孫進士及第以殿中丞
通判廣州有廉名真宗東封時躬詣孔子祠帝問宰
相孔氏今孰知名或言勗有治行卽召對擢太常博士
知曲阜縣瀕行夷酋爭持珠寶以獻並慰遣之後
以工部侍郎致仕卒年八十九子道輔御史中丞以
直名

徐休復字廣初濮州人太宗時第進士歷樞密直學
士太平興國中知廣州時轉運使王廷範有異圖初
梓川杜先生左道惑衆謂延範曰汝意有所之予來
陰助汝延範因而恣肆吉州卜者劉昂謂延範當偏
霸一方前戎城主簿田辨亦自言善相謂延範大貴
卽日當乘四門輦一夕與廣州掌務殿直趙廷貴等

會宿觀天象值太白度經南斗廷貴諺曰此所謂火星入南斗天子下殿走者延範遂與掌市舶陸坦議發兵焉坦代歸延範為書使偵朝廷機事休復來任與延範不協至是因懷勇小將張霸告其事馳奏之與昂辨坦俱斬廣州市廷貴等抵罪遷休復一官賜霸錢十萬

張鑑字德明涿州范陽人咸平初知廣州居二年民條其政績上請刻石鑑初在南海與通判李夷唐不協為所讒左遷

陶節夫字子禮鄱陽人晉大司馬侃之後咸平中起家進士為廣州錄事叅軍楊元寇暴山谷間捕繫獄屢越以逸既累年節夫後詰之乃吐服將適市與諸囚決曰陶公長者歸死可也後知新會縣時盜賊未息民少耕桑之業節夫盡力以圖百姓每視事勞瘁或寬譬之謝曰吾先刺史朝暮運甕勤於何有為之益力於是盜賊屏跡俗化禮讓廣帥章瓘薦之終虞部員外郎

馬亮字叔明廬州合肥人真宗時以右諫議大夫知

廣州兼市舶使時宜州陳進初平而澄海兵從反者二百餘人當配隸亮悉置不問鹽戶逋課質其妻子於富家悉令給還海舶久不至使招徠之明年舶至倍昔民夷大悅使賜宴以勞焉後知江寧府以太子少保致仕卒贈尚書右僕射謚忠肅

楊覃字申錫漢太尉震之後太平興國八年舉進士擢第大中祥符二年改太常少卿直昭文館知廣州兼市舶使勤於吏事所至以幹濟稱南海番舶之利前後牧守或致謗議惟覃以廉著遠人懷之加右諫議大夫四年卒遣其長子奉禮郎文友乘傳赴喪詔本州給所費還家錄其次子爲揚州司士叅軍

陳世卿字光遠南劍人雍熙二年進士第解褐衡州推官歷太常丞知新安縣或薦其堪任憲臺即召歸會張鑑出知廣州表爲通判將行召見賜緋加太常博士景德初徙知建州會邵曄知廣州被疾乃授秘書少監代之郡有計口買鹽之制人多不便至郡奏除之先是曄鑿濠藏舟以避颶風之害廣人歌曰邵父陳母除我二苦九年卒

陳從易字簡夫晉江人端拱二年進士及第歷太常少卿直昭文館知廣州三年遠俗安靖璽書褒美加三品服北還不市南物上聞即日擢左司郎中知制誥飛白書清字賜之後除龍圖閣直學士卒元豐中神宗問蘇頌卿母誰氏頌以從易女對上曰天聖間學士耶頌因言從易知廣州不畜南物上曰清節過馬援矣所著有泉山集西清奏議

彭思永字季長廬陵人天聖五年進士授大理寺丞監洪州鹽務移知南海盡心民事以母喪去職服除知分寧三邑素號難治民率化其誠相戒毋犯法因圍幾空後知潮州歷侍御史

蕭律新喻人景德間明經及第為廣州司法民有犯銅論死流者百餘人律曰利令智昏縉紳不免小民逐利詎宜深罪惟杖遣之其實仁類此

狄棐字輔之潭州長沙人天聖八年知廣州代還不以南物自隨人稱其廉

劉夔字道元建州崇安人進士中第直史館知陝州改太常少卿知廣州所至有廉名歷龍圖閣直學士

湖南安撫使以戶部侍郎致仕

田瑜字資忠河南壽安人舉進士歷知廣州儂智高犯邕上用兵禦賊十事智高平召對拜安撫使除龍圖直學士

劉湜字子正徐州彭城人舉進士累擢戶部郎中知廣州儂智高初平湜練土兵葺械器作鐵鎖斷江路有盜據山谷結營斬殺貸罪招之不肯降湜知山民資之食即徙民絕餉盜困蹙乞降民乃安居二年母老求內徙改知徐州

蕭注字巖夫臨江新喻人素磊落有大志尤喜談兵嘗以戰勝攻取自負皇祐初舉進士攝番禺令儂智高以舟師數萬攻城兩月勢危甚注潰圍出募壯士二千乘巨艦據上流因颶風起縱火焚賊舟大破之即日發縣門納援兵芻糧相繼入城中始有生意每戰輒捷賊解去鈐轄蔣偕上其功擢禮賓使副廣南駐泊都監賊還據邕管余靖患其嘯誘諸峒以屬注注挺身入蠻中施結恩信諸蠻從之賊平論功擢知邕州

蘇緘字靈甫泉州晉江人舉進士調南海主簿州領
番舶每商至則選屬吏覈其貨商皆豪族習以客禮
見主者緘以選往商樊氏輒升階就席緘下杖之樊
訴于州州召責緘緘曰簿雖卑固朝廷命吏也商即
富安能加於簿簿杖部民何罪之有州不能詰歷知
英州及儂智高攻廣州緘帥師赴援諭散賊黨智高
勢沮遂解去緘潛握歸路與戰大捷進兵備副使後
知廉州改邕州死交趾之變謚忠勇

盧士宏字子高新鄭人以父任屢更州縣歷知廣州
或傳安南舟數百泊海中將爲寇嶺徼驚搖士宏灼
其非是日從賓客宴樂民賴以安復畫策防守開誠
招諭蠻多化之後以光祿卿致仕卒

呂居簡河南人宰相蒙正之子初爲殿中丞慶曆中
提點京東刑獄夏竦有憾於石介介死竦言於上曰
介不死此走遼爾乃遣中使發棺驗之居簡力言不
可乃止進龍圖閣直學士知廣州陶甓甃城人以爲
便以兵部侍郎判西京御史臺卒

李兌字子西許州臨潁人英宗時登進士第由屯田

員外郎爲殿中侍御史加龍圖直學士知廣州爲政簡嚴人頌自劉氏納土之後獨允尤著清節還知河陽

徐九思字公謹崇安人登進士調蘄水尉歷知雙流宣化南陵三邑時趙抃唐介交薦入判三司坐忤時相通判廣州嘗與進士梁杞建議立香山鎮爲縣以便徵役神宗召對面賜褒諭有老練之稱旣而王安石惡其譏議新法復以附司馬光坐廢十餘年元祐初召爲江淮等路發運判副使致仕有新豐集行于

世

張田字公載澶淵人登進士第熙寧初加龍圖閣直學士知廣州廣舊無外郭民悉野處田始築東城環七里賦功五十萬兩旬而成其東南微陷往視之暴卒年五十四田爲人伉直自喜好嫚罵氣陵其下故死無哀者然臨政以清女弟聘馬軍帥王凱欲售珠犀于廣顧曰南海富諸物但身爲市舶使不欲自汙爾作欽賢堂繪古昔清刺史像日夕師拜之蘇軾嘗讀其書以侔古庶吏

程師孟字公闢蘇州吳縣人起進士歷知縣所至有聲知福州治行尤著移知廣州大脩學校日引諸生講解負笈而來者甚衆諸蕃子弟皆願入學以右諫議大夫再任在廣威愛並行初州城儂寇所毀即有驚民駭竄前守踵至皆言土䟽惡不可築師孟作西城廣十二里及交趾陷邕管聞廣守備固不敢東上遣中使撫問召判三班院念前功以爲給事中集賢脩撰洪福廣越爲立生祠

周諝尤溪人熙寧六年進士知新會縣是時新法方急郡縣望風焉諝獨不奉行免民於青苗且上書陳府力陳其弊爲百姓請命因求歸田里所著有孟子解義一時學者宗之

蔣之奇字頴叔宜興人以伯父蔭授官尋擢進士第歷集賢殿脩撰知廣州妖人岑深善幻聚黨二千人謀取新興畧番禺包據嶺表之奇遣鈴轄楊從先致討生擒之加寶文閣侍制南海饒寶貨爲吏者多貪聲之奇取前代牧守有清節者吳隱之宋璟盧賈李勉等十人繪其象建十賢堂祀之冀變其習凡所經

遊多所題詠歷觀文殿大學士

唐義問字士宣質肅公介之子也善文詞居官風力強敏以集賢殿脩撰知廣州為章惇所忌以棄渠歸罪貶舒州團練副使

李巖臨江人元祐二年知東莞縣為人端謹以能名邑之東江堤夏潦暴漲瀕江之田無不罹其害者始於西湖福隆石貝司馬頭京山牛渡海諸處築長堤捍之民獲其利明年復築鹹湖堤十有二延袤一萬六千八十丈田二萬千餘頃至今賴之

章棻字質夫建州浦城人其陰應舉試禮部第一歷官權戶部侍郎紹聖初加集賢殿脩撰知廣州時廣人冒鯨波殖貨利婦代夫訟父子異居兄弟骨肉急難不顧喪葬之儀過禮越制棻以習俗積久卒未能化昕夕砥躬思以導之以教化所始莫始於教於是遷於城東番山之陽日與學士諸生講論六經訓以保真心完實行士人翕然稱之後以龍圖閣直學士致仕卒

林動賀州人政和五年進士為廣州教授建炎三年

八月獻本政書十三篇言國家兵農之政率因唐末之敝今農貧而多失職兵驕而不可用是以饑民竄卒類爲盜賊宜假古井田之制令一夫占田五十畝其有羨田之家毋得更市其無田者遊惰者未作者皆驅之使爲隸農以耕羨田而雜紐錢穀爲十一之稅宋二稅之數視唐增至七倍今本政之制井十六夫提封百里爲井二千四百率稅米五萬一千斛錢萬二千緡每井賦兵二馬一率爲兵六千四百馬三千四百歲取五之一爲上番之額以給征役無事則

分爲四番以直官衛以給守衛是民歷三十五年而僅一役也悉上則歲食米萬九千餘斛錢叁千六百餘緡無事則減四分之三皆以一同之租稅供之匹婦貢絹三尺綿一兩百里之縣歲收絹四千餘疋綿三千四百斤非蠶鄉則布六尺麻二兩所收視絹綿率倍之行之十年則口筭酒醋茶鹽香礬之權者可弛以予民其說最悉書奏擢梧州節度掌書記朱熹甚愛其書東陽陳亮曰勲爲此書考古驗今思慮周密可謂勤矣世談井地之制者孰有加勲者乎要必

有崛起之主用於一變之後成順致利則民不駭而可以善後矣

周棟字仁熟泰州人熙寧中擢第徽宗朝以右文殿脩撰知廣州番舶至郡率以犀象香珠之屬為獻幢一無所受終任不至舶務人服其廉靖康元年卒子方宗禮部侍郎

張本中字崇正福清長樂人紹興元年知陽山縣勞心撫字循行阡陌察其豐儉施之以政民戴之如父母土人婚喪以歌為禮本中嚴禁之窳俗稍變

葉顥字子昂興化軍僊遊人登紹興元年進士第南海縣主簿攝尉盜發州檄巡尉同捕巡尉獲盜十餘人歸勞於顥顥曰掠美欺君倖賞三者皆罪吾不忍為也府帥曾開大喜之薦知貴溪歷郡並有惠政除端明殿學士拜參知政事同知樞密院以觀文殿學士致仕卒謚正簡

王宗已字子游長溪人紹興間進士為增城令以治行第一上特書名於屏秩滿調常熟縣尋知廣州官終朝奉大夫

林槩字端甫福建福清人初知長慶值歲大饑槩出粟賑之民多存活康定中以大理丞出知連州時州數被流賊槩選土民爲兵柵要衝購徭人使守禦由是賊不敢犯境嘗上封事請行唐府兵之法不報秩滿轉知淮安軍歷太常博士集賢教理

王大寶字元龜潮州海陽人紹興十六年以右丞議郎知連州下車訪民疾苦民皆謂月輪免行錢不便大寶爲減之時張浚謫居連州命其子棻從大寶學浚俸不時得大寶以經錢給之浚驚曰如累公何明

年知改袁州去累官禮部尚書

宋鈞字茂洪莆田人紹興進士知南海縣以廉能著聲民愛戴之歷知泉州

姚孝資紹興十九年以從政郎知東莞縣治才精敏下令闔境築堤護田水利大興民蒙其利時香山鎮輸役東莞道迂而險民以爲厲士人陳天寬等請建爲縣孝資疏聞從之於是敦武校尉劉必從捐地爲縣治至今賴焉

王中行揭陽人淳熙十二年知東莞恐祥愷悌博學

能文以興學崇化爲首務舊學湫隘弗稱輒遷之文風以振勸農桑均賦役恩敷惠流有循良風

黃適字德夫晉江人以詞賦稱紹興第進士乾道中知東莞事不苛而辦府帥意縣有餘藏適謁府輒遣掾攝縣掾希旨籍常賦爲贏以獻也：去適欲令再歛竟報不從帥賢之因薦適治狀籍記中書秩滿擢守新州

番恭字伯禮丞相正之子嘉泰中通判廣州秩滿民疏其惠愛二十事請留之部使者薦知南康軍改知紹興府所至絕餽遺杜請謁捐租省役特稱循吏後知廣州徭亂捕降其豪酋四十四洞悉平卒贈秘閣脩撰弟筠嘗獻備邊五策自江西提刑移知廣州

吳懿德字夏卿慶元人嘉泰二年進士初知玉山尋改新會俗故健訟多盜懿德至潔已率之規隨有給由錢訟牒錢一切罷去務賑民之急當春行部貸民錢粟值瘴癘大作親和藥以療之尋擢判廣州起卒嘗慕吳隱之爲人民哀其志祠于縣東配享焉

顏楠字養正永春人以太學生登開禧元年進士歷

知南海惠以威濟寇盜歛跡績上擢判循州歷知梅州

李華字實夫建安人嘉定十年爲連州司法時楞伽峽崩水逆行城郭連年昏墊華力請于郡復赴漕臺建議身任䟽鑿之責三載底績既滿去聞郡守留元長有遷學之議猶以俸錢五十萬助役端平二年轉廣東轉運使

方信孺字孚若莆田人登進士初爲番禺縣尉盜劫海賈方聚分鹵獲信孺捕之盜惶駭欲趨舟而信孺先使人駕盜舟去矣乃悉就縛不失一人其智畧類此嘉定元年擢端州通判承檄督捕雄韶峒寇尋知韶州在番禺時公暇則覽勝吊古揮毫賦詩士林多其風韻所著南海百詠傳于世

魏國梁字君用晉江人紹定己丑甲科爲廣東推官陳三鎗寇河源國梁以帥檄挺身諭降還斃于道事聞加以贈典官其子一人

梁益謙乾道七年擢知香山邑始建于紹興壬申前令簡陋自恕教化爲迂而范文林尤不恤民惟建寺

觀崇事佛老民苦之益謙下車首興學校講明經學
置田二百二十畝以增學餼南濠淤塞毅然疏之陂
田賴焉復捐俸置困備賑值歲大侵賴以濟者幾千
人淳熙元年代去士民爲立德政碑

許巨川字東甫溫陵人其學得伊洛之傳初董廣州
教事篤意訓誨士感其德祠之學東崔清獻聞而嘉
嘆嘉熙元年令東莞下車謁學以堂廡圯陋輒捐橐
中金新之沒官田一頃八十三畝歸于學儲錢十萬
爲異日脩治費邑務雖敏常與諸生講解以勵術業
尤愷悌愛民劉克莊時爲計使閱其斷訟謂其仁明
兼至莞人亦建祠祀焉

趙善鄜字國用鉛山人嘉熙四年知東莞縣節用愛
民科徵或不給則捐囊代輸剖決如流稱神明宰初
李巖築堤護田自姚令孝資脩後莫有繼者善鄜脩
舊堤一萬五千九十丈視地患水者復堤之事竣歡
聲載塗比去民思之不置

方大琮字德潤福建莆田人淳祐二年帥廣凡六年
以儒飾吏以政媿俗鄉飲酒禮久廢命賓佐與領袖

士討論之禮樂器服悉還古制歲一行之拜七十有
奇膝席以宴漏過三十刻時齒已邁而終禮無倦色
丁祭儀文未稱自冕服弁以至簠簋籩豆鍾磬琴瑟
祝啟之屬悉攷古訂禮改作又建書堂之飛閣翼以
四齋敞清海軍門以雄藩府規模十倍於昔

趙汝暨宋宗室也淳祐間兩帥廣前後凡五年公勤
清平始終如一獄吏舊以鞠賊爲奇貨一盜坐囚百
家股慄一切禁絕吏不得逞民受其賜州貢院舊苦
湫隘廣斥之出入場屋者便之運判宏齊包恢大書

其事立于學宮

李迪字復古其先趙郡人淳祐十二年知廣州明敏
嚴於御軍戢吏治盜發姦摘伏時而用之猾胥黠子
重足側立不敢逞郡學舊無便門迪始開創宮墻數
仞臺闔朔謁無下車殿庭之嫌民戶納地基錢吏以
名色掊尅其來久矣迪一切革去自支官錢與吏作
糜費外不許妄取一文既造朝刻木蒙蔽此意寢失
申劉應龍來奠南服復取迪條貫用之士民益動其
崇之思

謝子強寶祐四年帥廣東律已以蕪牧民以惠東吏以法已未廣右繹騷八桂開制閩供億取辦於民邊聲警甚處之裕如民不知有西帥內浚城池團保伍爲備禦計簡靜不擾海邦晏然市田以增學費蕪嶺舶事四年廣人歌頌德政余復亨爲之記立像與吳隱之楊長孺祀之

鄭格字迪民福清人少穎悟博聞強記時號書厨淳祐中第進士歷建寧司理有清介之操景定初授廣東察推其操彌勵所親規之曰子水蘖凜然不知何以爲出嶺計格曰旣能入嶺豈不能出嶺改知攸縣卒囊無餘財子堅姪聚皆博學清介世其家

楊觀春天華人淳祐五年知清遠縣愛民如子鋤惡不遺餘力尤注意學校門無私謁官舍蕭然

洪天驥字逸仲晉江人少有異質貫通經史嘗割股愈祖母疾淳祐中登進士初尉建寧以折獄見稱歷知香山縣旣至以育才爲首務脩文廟建學宮歛不及民悉捐俸爲之其政尚寬而裁以義邑多豪猾廉其尤桀黠者悉麗于法曰治蠹剔吾民安矣政聲大

著爲諸邑最經畧使洪勳趙汝暨雷宜中交薦其才擢大理寺丞知潮州與兄天錫齊名

曾逢龍贛州寧都人登慶元進士咸淳末爲新會令政務化民有古循良風每以節槩自許景炎元年六月元酋呂師夔遣其將黃世雄寇廣州經畧使徐直諒遣李性道拒之性道降虜受其官爵秋九月連韶諸郡俱降制置使趙潛乃舉逢龍判韶州將兵禦之時東莞民熊飛復廣州世雄遁去會逢龍引兵至性道迎謁因執斬之端宗在閩下詔褒其功師夔復大舉入寇逢龍帥師拒守南雄力戰師潰乃正衣冠雉縊而死事聞詔贈龍圖閣學士

胡穎字叔獻潭州湘潭人每見淫祠即毀之人謂之胡朴鬼咸淳二年知廣州兼經畧使廣有僧寺佛像中有巨蛇時出享人祭祀僧倚以爲利穎至毀佛擊蛇其恠遂息

陳塏字子爽嘉興人歷京湖制置使司主管機宜文字進集英殿脩撰知婺州改知太平州兼江東轉運副使請蠲放諸郡災傷加戶部侍郎進寶謨閣待制

知廣州權兵部尚書咸淳四年卒謚清毅塏屢歷麾節軍民愛戴幕客盛多而塏又樂薦士所著可齊說藁二十卷

元方思廣字可大上饒人至元三年知連州增學田立義塚勤於撫字吏卒無敢恣者既去士民紀其政績于學宮至今尚存

左祥盱江人初授翰林從事爲學士吳澄所知泰定乙丑以承直郎知香山縣留心政教嘗作勸學文以誨童蒙士知嚮風世道日漓則刻諭俗編以警惕之

嘗與士子講論濂洛之學徙知增城兩邑並祀之

黃昭字觀瀾撫州人至正中授新會縣尹德政化民廉潔自守文章政事燁然可觀同時東莞尹楊大舉亦律已嚴待民恕政通人和民歌頌之

國朝畢瑄洪武元年知東莞縣時鄉邑罹兵燹之後田野蕪荒室空十九瑄拊循安集流亡來歸芟棘樹藝歲復有收民以樂業廉能表著於時

仲敬洪武元年授香山縣丞舊治在城內元末徙于蓮峰經兵燹廢敬至訪舊址經營之學宮廡舍莫不

犁具復勸農桑撫流移所弛張民皆便焉忽值寇至衆情徬徨敬躬捍禦之寇宵遯百姓安堵敬之力也竟以勞瘁卒于官

吳拳湖廣人洪武二年知新會縣政尚平易善經理自縣治學校及壇祠鄉坊里甲巷陌葺治皆其功也洪武五年卒于官民無老穉咸哀之其後有謝景暘者陝人廉而愛民亦卒于官百姓哀之如吳拳也每新令至父老相謂曰得如謝公否

道同河間人其先蒙古族洪武三年以才幹舉爲太常贊禮郎十年出知番禺縣性剛毅廉介時天下初定軍衛強橫需求百出佐吏動遭筆楚前令不能堪比同至執法不阿民賴以安權貴惡之未幾求嘉侯朱亮祖至屢以威壓同同不少懼時有土豪數十人遇閭里珍貨輒抑價買之稍忤其意卽誣以鈔法人莫敢誰何同廉得其狀捕械通衢諸豪詣亮祖求解亮祖召同勞以酒食徐爲言之同厲色曰公爲大臣奈何聽小人使乎亮祖不能屈次日亮祖過通衢被械者方曝烈日中哀呼祈免亮祖釋之有納女於亮

祖者因怙勢凌人同按法治之亮祖去後以他故杖同同遂數其罪奏之疏未至亮祖誣同抗訕奏先馳達上未察其情遽命僇同適同奏亦至上嘉其職卑敢言不避權勢遣使宥之兩詔同日抵廣州而前詔先下同竟死邑民悼惜之亮祖尋以罪徵還同性峭直噐宇魁岍奉母備甘旨與妻子同粗糲布政使徐本雅重同嘗按一醫士罪當笞本亟欲得醫遣胥諭同釋之同曰徐公亦效求嘉侯耶笞之乃已同沒後邑民有祀于家者卜之輒驗人以爲神云

鍾勗字士懋慈谿人少力學以詞翰自負洪武五年知番禺縣政尚平易不喜苛察適造巨艦富商儲貨高其值民病之勗預采藤木以需官民兩便六年颶風湧漲平地水深數尺鹽倉濱江貯數百萬計浸幾及之勗躬率民丁築堤以防令家出一囊盛土石不日而就貨賴無恙是時學校頽圯勗捐俸建之未幾坐事免歸十六年以明經舉授兵部侍郎卒于官子求亦舉明經仕至戶部侍郎

詹勗字勗之江右饒州人洪武五年知東莞廉介有

守嚴于吏而寬于民脩廟學均力役詞訟日簡時海
微寇發躬率兵擒之民藉安堵同時有屯留郭郁鄰
者來爲丞愛民是務清白自勵蔬食晏如也有見其
隆寒衣薄而遺之裘者峻却之比卒無以爲歛人爭
賻焉

邢昭洪武八年來司新會稅課甚廉介俸入不足以
奉饘粥日中嘗缺食人或遺之米輒令持去謂其妻
曰饑猶可任况我若何比滿去橐中不足以治裝人
復遺之竟不受及嫁女廣州畧籍其貲以歸

童謨浙江人洪武中知番禺縣邑在省會稱繁劇謨
以廉謹自持政平賦均民安訟息政績爲諸邑最以
憂去後歷江西按察使

王仁山西人洪武十一年以茂才知東莞爲政明敏
務抑豪強武斷者必繩以法豪猾凜然憚之尤汲汲
興學校崇教化暇則與諸生講解以勤惰示勸懲士
習爲之一新

潘俊字國英洪武十四年知陽山縣時當草創遷邑
建學俊皆殫力爲之人多其功然邑尚未城惟列柵

以守後八十年贛人劉廣來令始以甌瓴爲之民至今賴焉

王世榮金華府人以太薦洪武十六年舉人材知東莞愷悌慈愛勤于撫字時邑遭寇變人民流離乃招逃亡恤無告力行寬惠以甦困踣邑人至今稱之

侯禮字立之臨桂人洪武中以太學生拜江西僉事坐事謫判連州會徃徃貌阿孫等剽畧經年禮躬抵賊巢諭以禍福阿孫率衆向化未幾徃變廖廣秀據高良鄉禮再招徠之悉爲編氓秩滿擢知本州九載考績士民保留再任九載人至今思之

彭豫字與志吉安泰和人洪武中舉明經爲萬安訓導以言事擢香山丞邑在海島間地僻俗囂前爲縣者率尚威嚴豫至卽寬教令省刑罰廢敝具舉流亡來歸濱海諸屯帥暴橫爲民害者豫悉遣還倭奴出沒海上豫教之樹柵積石以待討獲其艦自是不敢近俗蓄蠱毒中者輒死豫廉得之誅徙其家後莫有犯者暇卽詣學訓勉諸生登科者相繼居六年卒李鐸洪武二十年知清遠縣勤于政事明刑均賦吏

胥無敢欺創官署脩學宮悉捐俸爲之時稱賢令今
祀名宦

盧秉安字文定南豐人洪武三十年知東莞廉介忠
信政尚平恕視民不啻子然興利除害殫力爲之歲
小侵則緩催科曰上官罪後期吾自當之不忍迫吾
民也民反爭輸惟恐累令有兩造于庭者諭以理令
自悔罪不從則語之曰曲直吾已洞見第不欲明折
而曲置而于法不得爲良民耳於是曲者愧悟而退
民有過失笞以示辱而已庭無健訟囹圄常空九年

當去民保留之居十九年民再留不可得後調東阿
卒于官聞者莫不流涕相率設位于演武亭祭之

熊瓚南昌人未樂中知南海縣處心平易政無苛擾
雖當急遽不輕勞一民而庶務無叢挫者民甚感之
秩滿超擢禮部郎中

葉光閩縣人未樂初爲南海簿攝邑廉明吏不忍欺
民歌之曰南海簿性不貪百鳥鳳人中難後乞休歸
以詩名

蔡惟溥泉州晉江人未樂三年以進士擢知香山性

沉重喜怒不形撫集流民不施鞭朴而百廢悉舉邑豪有號三虎者惟溥往捕誅之間里以安秩滿士民保留不獲擢知欽州

馮誠饒州浮梁人未樂間以進士知香山廉介自持寬嚴有則時海濱田多浮生豪右爭奪訟連年不決誠秉公斷之兩造愜服其訟始息云以外艱去民買舟送至庾嶺而還後擢監察御史

阮嗣字繼之連江人宣德初爲連州判官興利除害卓有政聲州累被山寇譚應真劫害嗣躬撫諭悉歸欵民始獲安秩滿擢河南叅議去後人思其德祀干名宦祠

范憲江西樂平人正統七年以才行舉授東莞丞性沉毅寡言笑在事八年民多戴之歲己巳土孽黃循等陰黨叛賊來攻城邑憲率民兵禦之衆寡不敵死焉聞者莫不悼惜

周亶餘姚人景泰初丞南海上官以爲能每倚辦焉順德之設亶旣相土遂以知縣經營規畫蓋多創始之功是時大盜初平俗尚犷悍亶嚴什五之法奸不

能容其治務在富民春日行郊常歌以勸農居一歲卒祀名宦

蔡瑛字世傑龍溪人景泰四年知連州興利革弊政令嚴明尤拳拳於學校擢平樂知府

陶魯廣西鬱林人父成浙江按察僉事死節景泰五年魯陰新會丞值令缺魯視篆精敏祛宿弊正詭籍

猾胥不敢舞文書承惟謹而已民以事至者過去輒能識其姓名威信大著民趨令如流水比秩滿值西

路諸徭寇境甚急百姓詣當道乞留許之魯力設備城守習民戰甚得士卒心樂為死守賊勢張甚自高

廉以東無完邑而新會無害魯之力也尋擢本縣令歷官湖廣布政使所至多戰功

王重江西人景泰七年進士知新會縣性峻潔嘗以事忤法司下獄治之重曰請以官相還毋煩刑矣時

部民同收獄中者身左右之重愈矜莊月餘以清白得釋天順五年卒于官囊無長物人服其操

孔鏞字昭文長洲人景泰甲戌進士始令都昌以憂去改任連山時為流賊所破據為巢穴民被屠虜餘

皆流徙他郡鏞旣至依州而居始召邑耆詢民疾苦招撫流離賑以官廩令墾廢田乏耕具者給之天順六年大軍征諸蠻峒鏞率義兵爲鄉導首破賊巢大軍繼之始復縣境遂遷縣于鷄籠山城而守焉尋創公署學校及壇祠舖舍規制一備鏞每克賊壘先拘賊所俘虜男女聚之一處兵不敢侵撫諭徭衆悉爲齊民疏井泉通山徑便民之政無不畢舉未幾以功擢知連州闔邑如失父母累官兵部侍郎

吳中字時中樂平人天順五年以進士知東莞蒞事

明敏濟嚴以寬巡撫葉成無薦守惠州比去民立遺愛碑後一月邑寇起督府韓雍檄中捕之中下令能出首相捕者免罪嚴行保甲法十家互相糾察一夫不軌九家同坐旬日遂獲渠魁雍喜其能復留控制盜賊中編蛋戶爲甲令各漁其海遇賊舟則尾至其地輒捕之盜遂絕跡奏改知廣州至則興學校勸農桑均徭役撫恤困窮城池學舍悉力新之嘗編廣州志甫成以憂去後歷貴州布政使

婁璿浙江東陽人成化五年以監生知順德性剛果

廣東通志 卷之三
好摧折權勢事無大小自決豪猾不敢過縣門宿弊
爲之一清璿刻廉自喜聞貪者輒厲聲罵雖上官僚
佐不避人多嫉之遣子就外傳令自執蓋曰皂隸役
於官非汝役也其嚴如此竟坐誣去後祀名宦萬曆
十二年部檄削璿士論惜之

劉綱麻城人舉人成化乙未知清遠縣歲饑賑濟有
方民賴存活創闢學宮規制宏壯均賦役勤撫字士
民思之立遺愛亭于述運所前

黃諒江西豐城人舉人成化庚子知清遠縣蒞政八
勤臨民平易人以爲識體而捐貲修學尤惓惓焉

伍希淵字士賢江西安福人天順甲辰進士成化十
一年由刑部郎中以誑誤謫廣州同知十四年留知
廣州事爲政平易愜民情興利除害雖嫌不避士民
歸之後歷廣東左叅政湖廣右布政使祀名宦

高巒光澤人成化中知陽山縣廉介有爲百廢具舉
脩建學校積稻七千餘石以備凶荒民咸賴之

朱顯延平人成化十四年以舉人知香山性敏捷扶
弱抑強諸健訟輩凜然畏之終其任莫敢逞一詞性

寡交門無私謁諸所營建吏不能欺豪民悍卒齷齷奉法在事六年以憂去

丁積字彥誠寧都人成化中第進士知新會聞陳獻章紹明理學私淑之政事必咨焉每詢民俗而曰俗之不美教不明也於是布教令明約束俗故多豪健訟悉廉之于法有中貴第責民償逋過例積得其情取券火之且收繫獄一時豪猾屏息良家子或博賭破產召至訓以小學使知大義其風寢息又俗漸僭侈積定爲禮式令民守焉先是民苦賦外月供錢吏胥緣而爲奸貧者至鬻子女積論丁均派令歲輸畢卽歸農民歡若更生以俗信巫鬼遂痛毀淫祠壬寅大旱虔禱圭峰值酷暑昕夕伏壇下八日不雨積羸甚跪烈日中忽大風飄火着積衣不爲動須臾大雨人以爲精誠所感云積嘗爲民辯冤忤當路繫獄號泣欲爲營解積書示父老曰心苟無愧禍福非所圖也汝輩第安之慎毋重令之不德久之得釋卒年四十一百姓哀之有姬哭于家人問故曰丁令公死里胥復橫索妾無死所矣其感人類如此相率祠之

高瑄閩縣人成化十九年知番禺縣爲政先風化後簿書節財務義以身倡之且廉正有威人自不犯縣左有權倖所創寺僧不敢杵鐘權倖問故曰畏高令耳明日僧逝去權倖尋亦撤鐘布政使陳選每嘆賞曰古循吏弗過也瑄母誕日選爲詩贈焉市舶太監常眷家人不法選籍其私貨諸司無敢收者瑄請以身當之盡沒入庫權貴爲之奪氣未幾眷誣奏選被逮瑄亦落職束書數筴角巾飄然去士民泣送者幾千人

劉瓛字廷珍山東歷城人以進士歷大理寺丞成化末貶知連州時長吏溺於姑息民多犯法瓛懲其弊政教嚴明於是遠近相戒無敢犯者明年遷蘇州府同知累官僉都御史

林泮字用養閩縣人弘治元年進士歷知廣州府爲政溫惠不擾于民俸入惟給公應囊無長物歷官南戶部尚書自奉無異寒素人頗有公孫布被之譏沒之日無以爲殮人始服其清

蔣弁字誠之廣西全州人成化丁未進士弘治初知

南海縣誠心蒞政吏不忍欺民蒙其惠累官戶部尚書先昇知南海者巴陵楊純亦廉慎自持有政聲士民稱之

黎禧廣西陽朔人以鄉薦知增城有治才水蘖自厲時劇賊殘破諸邑嘗獻議于僉憲陶魯討平之又脩城興學實心實政斤斤愛民後判瓊州

吳廷舉者蒼梧人也字獻臣弘治二年以進士爲順德令廷舉疆力有幹而耻卑趨唯喏之節至則脩學宮毀淫祠刻家禮書教民遵守推下賢士存贍孤獨

錄寡凡可勸勵風俗俾助元元行之如恐不逮官寺城郭下至鄉亭百廢具興稱能吏焉邑有大鑄以家廟屬都御史屠瀟瀟語廷舉謝不應市舶中官以金市葛故事與葛而還之金廷舉曰葛非邑產君其問之雷州已又有中官行過縣索賂廷舉率士民逐之御史汪宗器曰是固抗上市能者會廷舉毀淫祠以材築堤治學宮御史按而會其直竹木瑣及斤兩廷舉日囚服對簿士民泣訴廷舉無私盜狀御史大慚乃罷居八年遷成都府同知民數百艘送之棹不能

舉廷舉賦詩別無不泣下霑衣者後歷本省藩臬南京工部尚書卒謚清惠廷舉身長面如削瓜敝衣穿帶不脩藻飾而神采英毅言行必自信人莫能奪生平廉介妻子不免饑寒海內高其志節

廖輔字舜元福建汀州人弘治二年知連州政事明敏士民畏服工草書人咸珍之

吳孟謙莆田人家貧爲府小吏性峻潔容止端嚴同列對之無敢偷惰弘治三年來爲順德丞民供折薪錢歎曰丞何功其受此哉番禺後山之役奉檄轉餉

盤運久多滛損不足孟謙自以俸償人無知者尋卒于官庶吉士鄒智誅之曰君裳蕭疎君貌嶮嶮公庭如寺詩思如水李承箕志順德傳孟謙廉吏智承箕皆聞人世以此益知孟謙

林高福建羅源人弘治八年知連山縣勞心撫字敷政寬平縣自改設以來草創未備高視邑如家悉心綜理學廨縣署煥然改觀人謂鏞之後不可無高云曹鎬長洲人以進士歷知三州弘治九年知連州愛民禮士百廢畢舉嘗稽往牒讎校成志六載擢韶州

同知飄然挂冠去連人攀卧車轍者數百人

楊昂字孔顥建安人少師文敏公榮之孫弘治中以
廕知香山事里胥以其相裔也或遠迓焉昂曰是欲
爲楊鱈者邪斥而遠之饋送一無所受蒞政愷悌以
廉能馳譽巡按御史聶賢薦其堪治劇遂調順德其
政聲不減香山後致仕去子崇以粵僉憲至兩邑民
爭先快睹曰此吾舊父母之子也其遺愛如此

張璧浙江鄞縣人弘治庚午知清遠縣愛惜民財振
作士類城池橋梁殫心脩理以清慎自持卒于官民

思之

羅僑字惟升吉水人弘治十五年以進士知新會縣
治遵下積重江門之學訟平盜息百姓安之四載擢
大理寺評事以劾逆瑾幾不免瑾敗起廣東叅政邑
民歡迎如見父母亡何請老去士論高之

陳寧字仕泰福建晉江人弘治壬戌以進士知東莞
不期月百務具舉性剛方不畏權勢政暇則進諸生
講解久而不倦用未究而卒其清白足多云

張翽南寧人弘治壬戌以舉人知龍門才而廉不畏

強禦政平訟簡民德焉歷八年致政去先翱任有臨安柴申者通達治體工於詩文比卒民咸悼之

丘泰福建莆田人弘治十七年以進士令新寧剛明而斷時有滯獄久不決泰平讞之境內肅然盜賊聞風屏跡以外艱去至今民思之

陳九疇字禹學山東曹州人正德初以刑部主事謫知陽山有德量才識明敏廉介表表一時嘗積穀萬五千石備賑後值歲饑藉存活者萬計陽人感之累官兵部侍郎

徐志字子聞直隸山陽人工書能詩正德初知番禺縣有廉名上官所需悉出已俸不少科歛于百姓尤汪意學校諸生居學舍者廩既之時林廷玉督學于廣大見獎賞御史劉祥察其清慎薦知儋州

陳墀字德階閩縣人布政熈之子正德初以進士知東莞惟一僕相隨清慎律已愷悌愛民人信服之舊商引錢令皆自私墀悉解司府不少染指民有典女贖罪廉得其情白當道貸焉其仁愛類此官歷貴州按察副使

曹琚字仲玉郴州桂陽人弘治丙辰進士正德三年知廣州以教化爲首務作養生徒性剛勁不爲勢利所動時中官有奉命覈帑者勢灼甚或勸折節琚曰拙禍猶淺巧且深吾寧拙毋巧耳每事裁抑之中官不能堪然亦畏沮終不能加害總督陳金議徵鴨埠以克軍餉檄琚規畫之琚約已便民巡行七邑覈實務舒民害嘗得一木牌於番禺道中視其所書則後山殘民也自言被誣爲盜乞招撫以延旦夕卽其事上于總督招之得男婦數百人後山盜遂靖廣商

例納引錢舊多自私琚薄收之貯其三於庫備賑濟餘以代公費又罷農民例納曰是求仕而教之貪也派料物解京者舊爲豪猾侵削不完乃勾稽加懲且令州縣擇均徭之殷實者領焉上下宜之然持法不撓卒爲當路所中比調去士民爭送之

鍾文傑字邦臣長汀人進士正德七年知廣州威儀器度見者欽之性勤敏治辦人不敢干以私於風教尤留意焉時中使潘忠太橫將辱及之文傑談笑語之曰昔官邸署時公等嘗折節我今乃至爲公所窘

耶忠愧屈揖出之勤劬得疾卒于官

徐乾字健夫廣西臨桂人正德七年進士知新會縣政尚簡易士民以爲得令晚也邑接壤新寧奸民往往接買盜牛以窺厚利或聚黨行劫爲邑中患乾法除之又脩復山水子城募丁壯城守嚴保甲令戶長都老自糾察不良子弟尤加意學官弟子時優給以褒異等召爲御史歷廣東僉事終湖廣布政使

張欽江西南昌人正德八年丁以舉人知清遠縣性資雋爽操持廉介脩舉弗倦決斷如流廢墜悉舉尤長于折獄今祀名宦

張文造福建古田人正德九年以鄉薦令新寧邑連山海多盜民莫安生文造設鄉長鈴之朔望令關報善否民不敢欺盜乃息卒于官百姓爲之流涕

朱文簡浙之樂清人正德中知增城嚴正而敏治必鏟其豪猾值良田矮洞賊擾鄉邑兵憲王大用按縣剿捕文簡偵賊多藏主乃白其狀下令曰匿賊者法必死遂大索賊藏主隸于法餘悉殲之遐邇大悅王澄字克清羅田人進士正德末知番禺縣興學校

均賦役祛妖僧表貞節惟奉公脩職是務後擢主事
卒于京士民悼之

顧璣錢塘人正德己卯知新寧勤恪端介時民散於
兵極意撫恤之及剿捕師至憲副王大用委鞠所獻
囚玉石不少混有淑問之風亡何卒百姓哀之

傅應祥字德和進賢人進士嘉靖初知南海縣爲政
公平持守廉慎雖當繁劇而裁處雍容務從寬惠凡
百施舍不務表暴而去後民恒思之

曾仲魁晉江人進士袁鉞荆門州人鄉薦嘉靖初相
繼爲順德令皆廉靖不擾其恤里甲覈徵輸賑荒
弭盜賊政亦大相類仲魁擢給事中去鉞擢主事邑
人至今思以比召杜云

莊希纘字邦孝晉江人嘉靖二年知陽山縣平易近
民不務敲朴嘗脩韓公臺置田十畝爲祭資去後人
思之刻石臺畔頌德焉

李性字仲復長樂人嘉靖癸未進士知東莞縣不以
家累相隨政尚平易公庭肅清吏畏而民愛之時海
利入豪勢性奪而歸之民徭役悉均里甲不擾嘗集

諸士講論經義多所發明歷官知府

徐相江西都昌人嘉靖三年知連州砥節守公誓不苟取種蔬自給不御綺羅宿寇蘇政蘇晚爲梗設奇擒之闔郡安堵焉

朱道瀾字叔觀莆田人以進士知增城忠信明潔曉暢吏事嘗編徭役先以畸零作漏編後以諸虧糧攤實戶因利其餘銀百姓甚病之道瀾合畸零實戶均編之聽其餘在民民心感服立月會法聽民舉高年有行義者一人爲之長月率其鄉之衆會于一堂

社師誦爲善陰隲一通立善惡簿自書甘不善惡之尤者勸懲之民俗歸厚焉時學宮頽壞士鮮科第以興學作人爲己任又朔望課諸生講論經義日昃不倦於是歲薦得士四人遷太僕丞尋出憲嶺南行部至增城民忻忻若復見慈母焉

周延字南喬江西吉水人嘉靖癸未進士知新會性廉介治巖邑無留獄豪右歛跡時或危坐公庭寂如空齋云三年召爲給事中尋以言事謫官累遷廣東副使歷右都御史提督兩廣

廣東通志 卷之二十一 三十一
林士元福州閩縣人舉人嘉靖七年知香山縣廉靜
不擾撫愛小民每受訟牒怡色訊之盡得其情初學
宮圯于蓮峰山下士元遷建城中鄉書遂不乏人會
上官按部索賄不得坐以事將辱之士元奮衣起曰
媿民膏脂以媚人死不爲也竟不受辱而出卽疏言
母老乞改教職授潮州教授怡然就道

沈尚經貴州普安衛籍高郵州人嘉靖中以舉人歷
廣州府同知才識明敏聽訟每得隱情而操守清白
督學魏校毀淫祠寺觀勢豪多承田土或至興訟尚
經剖斷均其徭役輿情慙服擢刑部員外郎

林啓字仲鎮福建龍溪人舉于鄉嘉靖己丑知東莞
縣事以息獄訟均里甲正科歛爲首務春耕親出郊
勸農其爲政開誠布公不事細苛得牧民之體會海
寇黃秀山作孽巡按御史李美委責於啓啓歷險阻
討平之去日囊無餘貲民有齎金餽於途者啓峻却
焉

黃正色字士尚江陰人登嘉靖己丑進士初令香山
剖斷如流政聲藉藉吏部侍郎霍諤高其能調南海

令南海爲粵首邑百務糾紛正色以敏捷當之無不
迎刃解者其發奸摘伏如神兼攝番禺猶不足以窮
其技兩邑叢牘悉日中決之公庭清暇撫琴自適而
已尤廉介剛方勢家干紀必懲之不少假或以訴于
韜顧益多其風裁薦爲監察御史嘗劾附馬崔元內
侍鮑忠不法反爲忠所訐誣以大不敬逮赴論死適
韜以南宗伯召入謂鞫官曰鮑忠不法兩臺結舌言
之惟正色一人若阿權璫陷正色吾必直之乃獲減
死謫戍起歷少卿子學海贛州知府

林功懋字以謙漳浦人嘉靖壬辰進士知東莞縣才

識明敏嚴馭吏胥寬恤里甲滯獄積案爲之一清嘗
榷稅番舶賄賂一無所受時指揮王寵偕行聞之慨
然曰獨文臣不愛錢乎亦峻拒之夷人嘆服爲築却
金亭有巨寇許折桂旣降而恣橫不悛執而懲之卒
斃于獄民稱快焉擢戶部主事歷四川副使

胡鳳湖廣黃梅人嘉靖十七年以進士知廣州清白
自厲不施邊幅前掌郡者多侈侈庫役月費數百金
鳳嚴汰之日坐堂皇理民事決斷從其平至今民稱

其廉介

文章桂林人嘉靖十九年以鄉薦知增城性廉靜門無私謁里胥徵收者強索耗例以媚令輒侵牟其半章禁絕之學校壇宇莫不增脩而民不擾遷欽州守歷處州同知所至有遺愛云

何廷仁雩都人嘉靖壬午舉於鄉辛丑令新會心獨喜以爲幸仕道學之鄉不可失也至則脩社學敦師儒教其子弟其爲政務平易不煩繩束嘗視邑之要害曰松栢堡曰臨江臺咸請樹兵以衛四境暇則與

諸士講學於象山居官五載一如寒士尋擢南京戶部主事邑人每過象山書院輒指曰此何侯講學處也叅政區越爲勒德政碑焉復配享王陽明祠

石案字和仲陸林人舉人嘉靖甲辰知從化廉靜簡嚴以文學飾吏事莫敢干以私者奸民多服蔓誣人受者逞逞破家墨吏因而漁之案嚴其禁訟獄遂息居九月卒俸入僅足治喪士民悼惜祀于名宦

朱端明莆田人嘉靖二十三年以舉人知三水縣端恪誠信而人愛之禮賢士大夫如恐不及表章貞節

營脩學宮皆其惠政三水設邑以來端明稱最今河堤林木成陰皆端明所植人以比甘棠云

曹達太倉州人進士爲御史抗疏謫外嘉靖甲辰歷知廣州府性剛直潔已愛民而方於事上爲直指使者所齟齬不少變節人多其廉介後繼知府事如謝彬輩貪汙大著民益思之

呂天恩瀧陽人嘉靖丁未以鄉薦知從化才識過人敏于剖斷吏民畏之上官知其能以福地不能展其驥足屢檄署他邑視篆南海政績尤著六年擢判肇

慶府有去後之思歷官韶州知府

林騰蛟字士才福建永安人嘉靖二十七年以進士知新會先是邑苦苛政騰蛟至一切釐革之性敏而果斷喜抑豪強賊掾謝大用群無賴肆劫里中倚長潭盜何貳輩爲聲援騰蛟得其狀欲密討之有語及者置不答適新寧賊嘯聚金雞山佯爲追捕至水口遂移兵襲大用擒之斬首三十級俘獲無算方欲討何貳會毋計至卽使人招貳護行且曰汝素蓄毒毋弩宜以爲衛貳信之請歸治具與之期密遣驍勇伺便

廣東通志 卷之二十一 三十一 三百四十七
縛之餘衆犇白芒海生擒六十人斬首稱是於是四境晏然比去民思之後擢監察御史

孫學古字汝邃蕭山人嘉靖甲辰進士知東莞縣涖事嚴明令行禁止奸宄屏息學校公署悉加脩建未嘗科歛于民性頗急躁一日燕集指揮安憲微規之卽揖謝教刻銘座右其勇於受言如此時進父老儒碩于庭詢以政事利病閭閻疾苦每隆禮下之詩思春融一日經鳳臺社墨客咸集就與倡和人多其風致已西徵入未赴卒文場中邑有祠

沈應乾字惟順五河人嘗師事尚書霍韜大見稱賞嘉靖庚戌登進士知南海甫涖任不遠二百里詣謁墓泣而矢曰所不盡心百姓廉介自持負公之教者有如河乃詢利病訪得失採輿論而更革之省刑輕徭徵賦有法宿弊爲之一清壬子洪潦爲患民大饑殫力勸賑存活萬計鄰邑寇盜蠡起南海晏然應乾之力也以廉能入爲主事歷按察副使開國以來南海稱良吏者必曰黃沈蓋以黃正色與應乾並稱云至今猶頌之不置

廣東通志 卷之三十三 五十一 三百五十五
程度字弘甫南昌人嘉靖庚戌司訓連州器量深沉
學問該博外和內剛先行誼後文藝諸生中有貧薄
者量爲周給其模範足稱云

周文嫌閩縣人嘉靖三十一年以舉人任三水知縣
性廉潔而政務簡靜諸所不便于民者則毅然去之
營創述舉民不告勞上官高其能薦知六合縣

盛賚汝字以善常熟人以舉人知增城體若不勝衣
而泣事明敏案無積牘吏胥凜凜一跡時瀕海諸鄉
多盜當路議盡征之賚汝嘆曰玉石俱焚柰何亟上

白狀且陳鵬剿法上官聽之遂委焉乃懸賞格密劄
首惡無得脫者不濫一良民人感其德相率祠焉後
歷漢陽知府

鄭琛惠安人以貢授三水教諭學有淵源日聚諸生
剖析理奧窮年不倦甘於澹薄不受餽遺視諸生若
親子第居三年致仕其後諸孫聯登上第

張孔脩字德成餘姚人以鄉薦試潮之大埔令多惠
政尋改增城見百姓語煦煦若家人子人亦不敢干
之居無何寇掠我城下卽戎服登陴指麾守禦募勇

廣通志 卷之三十一 五百四十一
士縋下城擊賊斬獲賊首揭之竿賊宵遁內外安堵
學校祠宇必捐金飾之而衣垢茹蔬澹如也俗逋負
或格鬪輒飲藥以死誣人乃峻坐誣者竄俗爲之一
變諸鄉多虎患爲文牒城隍虎自斃林中召爲刑部
主事百姓扶老携幼爭送之

徐美字忠甫邵武人隆慶初以舉人知連州廩俸之
外纖介不私一夕微行有二婦張燈相謂曰清哉油
若徐令公然明旦召詰之曰爾言余清何徵婦曰闔
郡同稱獨小婦人乎民有貧而願出其妻者問值幾
何卽捐金與之遂夫婦如故山寇陳龍周掠連陽
邑戒其下毋犯賢太守境美曰皆吾赤子也躬往招
之遂降其衆數千三年擢承天府同知未赴卒連人
無大小咸喪之

胡友信德清人隆慶四年以進士宰順德先是俞思
誠貪霍邑中耗亂賦役率奸人掣輸其取於民贏常
十三而稍割以啗令於是率置不問正供之入徃徃
沒奸人橐中胥爲政比有賂卽負千百不舉無卽毫
釐以聞常被笞故爭賂群胥謂之月錢而正供反以

廣東通志 卷之二十一 六十一 三百五十
為緩盜賊公行桴鼓數鳴友信嚴涖之禁孽戶自主
其計約以三限使民得以多寡自輸輸無羸造縣門
歲不過三日民樂簡便輸之恐後烏洲大洲盜賊窟
藪友信以耳目起發主名區處誅其渠帥餘黨悉平
鄉立四應某鄉有寇則四鄉鼓而援之不援者與盜
同科於是攄聲相聞盜不敢發比伍中五年大饑斗
米至二百錢寧瘠死溝中無敢觸法其賊往來海上
亦戒無犯順德云初友信懼民輕法故猛厲以威之
凡獲賊醋其鼻或投諸淵久之乃出聞者震聳謠曰

山有虎邑有胡無撩其鬚後令行禁止更為寬緩
或旬日無一人矣其為吏如家敝輒脩墜輒舉自學
廟城池而下煥然一新友信廉卒含殮不具民爭賻
之其政雖尚嚴明而本之仁愛胸中洞達喜怒不留
卒之日民無不盡哀萬曆二年祀名宦民別為座祀
於城隍後復特建祠祀之

林會春字景仁惠安人以鄉薦隆慶四年知新會縣
性剛毅智畧過人發摘如神時倭奴陷廣海衛危及
新會會春乘城葺備累石監柵捍之仍檄居民各自

爲守倭聞引去先是酋舶駐崖山山故宋忠節祠焉
毀汗殆盡又利民間子女會春驅之出境而頑民許
求湯惟教黃恩寵等夙與之通販掠良民子女無慮
千指或操刃雄行里閭而誰何會春悉置于法時恩
寵兩子並掾藩司常爲耳目會春以狀聞并收之邑
民大悅復行鄉約嚴保甲設捕兵禁賭博詰盜掩骼
不遺力而行兩臺交薦之以治行第一賜宴禮部尋
擢戶部主事時外城未築濱行猶口念不置後令因
而城焉邑民建祠祀之

王良心字性德浙永嘉人隆慶辛未以進士知增城
嚴介簡重不輕言笑待胥吏尤峻無敢旁睨舞文者
邑中多豪猾屢興大獄或持吏長短良心甫至卽置
于法豪猾歛避之其自奉澹若儒生後徵拜給事中
民爲立去思碑

鄧文學馬平人隆慶中以舉人知清遠縣改建學校
士林多之尋撫剿猺獞有池水之捷卒後士民舉祀
名宦

周啓祥浙江海寧人進士萬曆六年以刑部郎知廣

州府性廉介多大度明習法令初至庭若昏昏不辯吏胥心易之啓祥愈自晦嘗角巾敝衣巡行吏舍時或私矚寮佐坐廳事則戒門下勿言後乃灼然開豁治爰書雖老吏不能過門以內澹如禪舍茹蔬服陋毫不以煩民每出簡輿從所至人不知其郡大吏也時聽訟兩造之詞務令必達煦煦若家人語嘗繫一里婦至盡地不入甚恐已迺令畢陳其詞比出謂人曰妾初以爲鉅公已乃一平易書生耶其近民類此會督府命討布浦劇賊諸將稍掠蛋民徼功較累

屬啓祥多讞出之或不能自存者發居民收血毋令獄死以俟必白所活以百餘計後以覲行道病卒于金牛驛囊中可數金而已粵人哀而祀之先是西蜀胥遇亦以剛方廉介著聲數月以憂去百姓爲之佐哀得民如此其速云

常若愚桂林人嘉靖末以鄉薦歷廣州府同知廉潔守高服御無異寒素嘗出署香山慈惠愛民郡守使人微之見其日啖瓜蔬竊歎其愚焉後郡人有客桂林者見其賣藥自給云時鄞縣毛爲光繼若愚至以

公清並顯一時

論曰余讀史遷傳循吏至石奢李離之事何與於最政而豔之不置是時蒼鷹乳虎以酷烈爲聲輕寃民命草菅而刈之故發憤至此曰是真良吏何必威嚴哉廣州多幢節大吏以故循良著於藩省而吳恢以下暢華之風清惠爲政代有其人陶士行之勤也吳處默之清也韓昌黎之惠也蔣之奇吳懿德之流治行表表未易縷悉焉我朝林泮溫惠不擾曹琚威懾權璫徐相守公砥節黃正色之惠流南海高瑤之風化番禺東莞則盧秉安增城則朱道瀾順德則吳廷舉連山則孔鏞翩翩循吏之流亞矣夫吏譬如手上脩頭而下脩足清溫寒熱不得不揀入苟膜外視之甚且鎔錐傳體茂如無有亦何異於痿痺不台也嗟嗟病莫憐於戕身人戕不可自戕若何余因有味史遷微旨感慨俎豆之賢無令望之若辰星焉

福建共
廿四人

復入

無疆

前志卷之二十一

廣東通志卷之二十二

郡縣志九

廣州府

流寓

周公師隅粵人越王無疆為楚所敗其子孫避處江
 南海上爭為王周赧王時有自立為王者隅以無疆
 初避楚居東武有恠山浮來鎮壓其地因名東武山
 乃往相度南海將依山築南武城擬之而越王不果
 遷時三晉惟魏最疆越王與魏通好於是使隅復往

南海求犀角象齒以獻之又在嶠外乃得諸琛併吳江樓船會稽竹箭獻之魏魏王乃起師送越王往荆栖之沅湘於是南武疆土遂爲越貢奉邑稱雄于交趾云

漢胡綱南郡葦容人清高有志節平帝時大司馬宮辟之值王莽居攝綱解其衣冠縣府門而去遂亡命交趾隱於屠肆之間後莽敗乃歸鄉里

袁忠字正甫陳國人曾六父安塋父得吉地占云伏虎蟠龍世爲上公其後田系世隆盛安子敞孫逢逢第

隗皆至三公忠性高潔與同郡范滂爲友黨錮禍起就格爭受楚毒初平中爲沛相乘輦車到官以清亮稱及天下大亂忠棄官客會稽上虞一見太守王朗徒從整飾心媿之遂稱病自絕董卓旣誅李傕郭汜逆亂忠乃與徐州刺史陶謙糾合豪傑共推車騎將軍朱儁討賊雖不果行聞者義之後孫策破會稽忠與桓曄等浮海入粵獻帝都許徵爲衛尉未至卒其子孫有居連州高良者服勤稼穡闢龍腹陂開渠引水灌田至五千餘頃民立廣利廟祀之

袁徽字慎卿陳郡扶樂人父滂純行寡欲不談人短官至司徒當權寵盛時或以同異致禍滂獨免焉徽少以德行聞天下將亂兄渙與徽圖安身之策徽曰古人有言知幾其神乎見幾而作君子所以元吉也天理盛衰漢其亡矣夫有大功者必有大事此君子之深識退藏於密者也且兵革旣興外患必衆徽將遠迹山海以求免身及亂作各行其志爾建安中徽避難交州司徒辟不至居蒼梧往來南海與士燮兄弟相善清高儒雅爲時所重

劉熙字成國北海人博覽多識名重州黨建安中薦辟不就避地交州往來蒼梧南海間授生徒數百人作釋名二十七篇

三國許靖字文休汝南平輿人少與從弟劭俱知名郡察孝廉除尚書郎典選舉董卓秉政以周苾爲吏部尚書與靖協議謀進退天下士拜韓馥等爲牧守而遷靖御史中丞馥等到官各舉兵誅卓卓怒殺苾靖懼誅出奔流宕豫楊吳會間會孫策東渡江復走交州避之交趾太守士燮厚加敬待靖寓南海頗久

後劉璋招之入蜀拜廣漢太守建安十六年轉任蜀
 郡聞操立諸皇子為王嘆曰將欲歛之必固施之將
 恐取之必固與之其操之謂乎十九年昭烈克蜀始
 以靖虛譽而無其實法正言當如燕之待郭隗遂以
 靖為左將軍長史昭烈為漢中王靖為太傅及即皇
 帝位策靖為司徒雖年踰七十愛樂人物誘納後進
 清談不倦丞相諸葛亮皆為之拜章武二年卒

程秉字德樞汝南南頓人少明周易詩書復逮事鄭
 玄避亂南粵與劉熙考論大義遂博通五經士燮命

為長史孫權聞其名儒以禮徵秉既至拜太子太傅
 著周易摘尚書駁論語弼凡三萬餘言

虞翻字仲翔餘姚人少好學有高氣年十二客有候
 其兄者不過翻翻追與書曰僕聞琥珀不取腐芥磁
 石不受曲鐵過而不存不亦宜乎客得書竒之由是
 見稱為孫策功曹待以交友之禮後漢召為侍御史
 曹操為司空辟皆不就嘗以所著易注示孔融融荅
 書曰聞延陵之理樂觀吾子之治易乃知東南之美
 者非徒會稽之竹箭也孫權時為騎都尉翻數犯顏

諫爭權不悅權既為吳王宴末自起行酒翻佯醉伏地權去翻起坐權大怒手劍欲擊之侍坐者莫不惶遽惟大司農劉基起抱權力諫翻始免翻性踈直數有酒失權與張昭論及神仙翻指昭曰彼皆死人而語神仙世豈有仙人耶權積怒遂徙翻南海寓南粵王建德故園今光孝寺翻雖處罪放而講學不倦門徒嘗數百人又為老子論語國語訓註皆傳於世翻既放棄嘗曰自恨踈節骨體不媚犯上獲罪當長沒海隅生無可與語死以青蠅為吊客使天下一人知己者

足以不恨初山陰丁覽大末徐陵或在縣吏之中或眾所未識翻一見之便與交善終成顯名在南十餘年年七十卒歸葬舊墓妻子得還翻子十一人汜最知名嘗為監軍使以討扶巖功拜交州刺史封餘姚侯尋卒

樓玄字承先沛郡蘄人孫皓時為大司農禁中主者舊用親近人克之皓因人言令有司求俊良以應其選遂用玄為宮下鎮禁中侯王暇中事玄從九卿持刀侍衛正身率眾奉法而行每對切直數迂皓意後

人誣玄與賀邵相逢耳語謗訕遂被詔詰責徙廣州東觀令葦覆之上疏救之皓不聽玄至廣州訪虞翻故宅徘徊躑躅哀咽悽愴不能自勝皓忌玄名復徙玄及子據付交趾將張奕使以戰自效陰勅奕殺之據到交趾病卒玄孤身隨奕討賊持刀步涉見奕輒拜奕未忍殺會奕暴卒玄殞歛奕於噐中見勅書還便自殺

六朝王叔之琅琊臨沂人王鎮之爲廣州刺史吏治政譽著于南土晉宋之際王室多艱叔之與兄伯之共將家口踰嶺相依及至廣州愛羅浮丘壑之勝嘗登山賦詠復築室於鳳凰洞之南携子弟讀書其中自稱處士示無宦情庭植蘭菊作銘曰蘭旣春敷菊又秋榮芳薰百草色艷群英孰是芳質在幽愈馨朝斯夕斯願言永貞其志尚類此世遂傳王生得儂至今王子洞猶存所著集十卷莊子義疏二卷

劉祥字顯徵東莞莒人仕宋爲員外司徒褚淵尚公主爲齊佐命功臣司徒袁粲丹陽尹劉秉討蕭道成不克死之時人爲之語曰寧隨袁粲死莫作褚淵生

祥少好文學性韻剛踈輕言肆行不避高下時淵復
爲齊司徒入朝以腰扇鄣日祥從側過曰作如此舉
止羞面見人扇鄣何益淵曰寒士不遜祥曰不能殺
袁劉安得免寒士永明初遷長沙王諮議叅軍撰宋
書譏庠禪代書尚書令王儉密以啓聞上銜而不問
爲臨川王驃騎從事中郎嘗著連珠十五首以寄懷
其譏議有云希世之寶遠時必賤備俗之器無聖則
淪是以明玉黜於楚岫章甫窮於越人有以祥連珠
啓上上令御史中丞奏其過惡付廷尉祥事事自申
上乃別遣勅祥曰我當原卿性命令卿萬里思愆卿
若能改革當令卿得還乃徙廣州祥至廣州不得意
終日縱酒亡何病卒

張融字思光吳郡人弱冠解褐爲宋新安王子鸞行
叅軍出爲封溪令從叔永出夜渚送之曰似聞朝旨
汝尋當還融曰不患不還政恐還而復去及行路經
嶂嶮獠賊執融將殺食之融神色不動方作洛生詠
賊異之而不害也浮海至交州於海中遇風終無懼
色方詠曰乾魚自可還其大鄉肉脯復何爲者哉鎮

軍將軍顧覲之與融兄有恩好覲之卒融身負墳土在南與交趾太守卞展善展於嶺南爲人所殺融挺身奔赴往還南海竟返其喪嘗登越王城別友賦詩而歸後舉秀才對策中第爲殿中郎不就融爲人風止詭越坐則危膝行則曳步翹身仰首見者驚異齊高帝曰此人不可無一不可有二蓋病其畸也

范縝字子真舞陰人齊永明中與魏和親簡才士爲行人而縝應選以此知名歷宜都太守後仕梁武帝而中書令王亮與縝相友善縝嘗舉亮而鄙謝朓行

旨下廷尉治之免死徙廣州初縝侍竟陵王子良子良精信釋教而縝盛稱無佛子良問曰君不信因果世間何得有富貴貧賤縝曰人生譬如樹花同候隨風而墮有墜茵席者殿下是也有落溷側者下官是也貴賤雖復殊塗因果竟在何處子良不能屈縝退而著神滅論子良集增難之而不能屈縝在南海累年徵還拜中書郎國子博士

庾道愍鄆陵人晉司空冰玄孫有孝行頗能屬文少出孤悴其所生母漂流交州道愍尚在襁褓及長知

之求爲廣州綏寧府佐而南去交州尚遠乃自負擔
冒嶮僅得自達及至交州經年日夜悲泣嘗入村日
暮雨驟乃寄止一家見一嫗負薪外還道愍心動因
訪之乃其母也於是行伏號泣遠近赴之莫不揮淚
道愍精相手板知人休咎後仕齊至射聲校尉

謝貞字元正陳郡陽夏人幼聰敏有至性祖母阮氏
先苦風眩每發便一二日不能飲食貞時年七歲祖
母不食貞亦不食往往如此母王氏授以論語孝經
讀訖便誦八歲嘗爲春日閑居詩從舅王筠竒之年

十三善左氏春秋工草隸蟲篆十四丁父艱號頓於
地絕而復蘇初貞父蘭以憂毀卒家人賓客復憂貞
從父洽族兄暲乃共請華嚴寺長爪禪師爲貞說法
仍壁以母須侍養不宜毀滅乃少進饘粥及魏克江
陵人入長安貞隨暲逃難番禺貞母出家于宣明寺
及陳受禪暲還鄉供養貞母將二十年後爲南平王
友掌記室事府長史汝南周確新除都官尚書請貞
爲讓表後王覽而竒之及問知貞所作因敕舍人施
文慶曰謝貞在王家未有祿秩可賜米百石以母憂

廣東通志 卷之三十一 九
三原
去職頃之敕起還府累啓固辭敕不許貞哀毀羸椿
終不能之官舍尋卒遺囑薄板固身覆以草席埋於
親墓之次始終篤孝廣人聞而哀之

袁敬字子恭陳郡陽夏人天性純素有風格幼篤學
老而無倦仕梁位太子中舍人魏剋江陵流寓嶺表
陳武帝受禪敬在廣州依歐陽頎頎卒其子紇據州
將有異志敬累諫不從宣帝卽位遣章昭達討紇紇
將敗恨不納敬言朝廷義之徵爲太子中庶子歷左
戶都官二尚書太常卿散騎常侍金紫光祿大夫加

特進至德三年卒謚靖德

杜弘文交趾朱戡人本家京兆高祖元爲寧浦太守
遂居交趾祖瑗仕州府歷日南九德交趾太守交州
刺史藤遜之當至九真太守李遜作亂斷遏水陸津
要瑗收衆斬遜州境獲寧遜之北還林邑王范胡達
攻破日南九德九真三郡瑗大破之胡達走還林邑
以功爲龍驤將軍交州刺史義熙初進號冠軍將軍
盧循竊據廣州遣使通好瑗斬之義熙六年卒年八
十四父慧度平盧循有功語在事紀弘文以學行舉

孝廉官至員外散騎侍郎慧度聞劉裕北征關洛板
弘文爲鷹揚將軍流民督護配兵三千北係文軍行
至廣州關洛已平乃歸統府板弘文行九真太守及
繼父爲刺史亦以寬和得衆襲爵龍編侯太祖元嘉
四年以廷尉王徽爲交州刺史弘文就徵書得重疾
牽以就路親舊見其患篤勸表待病瘳弘文曰吾世
荷皇恩校節三世常欲投軀帝庭以報所荷况新被
徵命而可宴然者乎如其顛沛此乃命也弘文母旣
年老見弘文輿疾就路不忍分別相與俱行至廣州
遂卒臨死遺弟弘猷詣京朝廷甚哀之

童華字仲宗吳興人家本農夫至華獨好學與士君
子游處頗通經史善屬文侯景之亂游嶺南居羅浮
山寺專精習業歐陽顛爲廣州刺史署爲南海太守
顛子紇敗乃還都後王除太市令非其所好乃辭以
疾禎明初上書極諫其畧曰昔高祖南平百越北誅
逆虜世祖東定吳會西破王琳高宗克復淮南關地
千里三祖之功亦至勤矣陛下卽位于今五年不思
先帝之艱難不知天命之可畏溺於嬖寵惑於酒色

祠七廟而不出拜妃嬪而臨軒老臣宿將棄之草莽
諂佞讒邪升之朝廷今疆場日蹙隋軍壓境陛下如
不改絃易張臣見糜鹿復游於姑蘇矣書奏後王大
怒即日斬之未幾隋軍至陳遂亡

謝嘏字含茂陳郡陽夏人風神清雅頗善屬文起家
梁祕書郎稍遷太子中庶子出爲建安太守侯景之
亂嘏往廣州依蕭勃勃敗仕陳爲中書令

房恭懿字慎言洛陽人性深沉有局量達於從政隋
開皇初爲德州司馬政爲天下之最上曰恭懿所在
百姓親之朕若置之而不賞上天宗廟其謂我何下
詔拜海州刺史博士何妥言恭懿乃尉遲迥黨不當
仕進上大怒恭懿竟得罪配防嶺南未幾徵還遇患
卒洪州論者于今寃之

盧崔仁師安喜人貞觀中爲侍御史治獄仁恕遷給事
中左遷鴻臚少卿征遼東時以事除名起爲中書舍
人檢校刑部侍郎幸翠微宮上清暑賦以諷帝稱善
賜帛五十段二十二年遷中書侍郎叅知機務被遇
尤渥中書令褚遂良忌之會有伏閣訴者仁師不時

上帝大怒流連州永徽初授簡州刺史卒

房融河南人聰慧好佛唐武后時以正諫大夫同平章事長安末嘗知南銓在廣刑時值天竺僧般刺密諦三藏持楞嚴經梵本浮南海而至融就制止光孝寺譯出而筆授之今寺中有筆授軒云神龍元年五月經成入奏適武后崩融長流欽州徙高州死後僧神秀入內道場見所奏經本錄傳于世由是楞嚴經大顯於世遂爲佛學之宗子瑄官宰相亦酷好浮屠能空談有陳濤斜之敗時人比之王衍

杜審言字必簡襄陽人擢進士爲隰城尉恃才高以傲世見疾遷洛陽丞貶吉州司戶坐事免官還東郭則天召爲著作卽神龍初坐交張易之流峰州嘗寓南海遊白雲至亂石山賦詩往來交廣久之入爲脩文館學士卒初病甚見省候者獨謂宋之問武平一曰甚爲造化小兒所苦尚何言然吾在久壓公等今且死固大慰但恨不見替人云與李嶠崔融蘇味道爲文章四友融亡審言爲服總世稱其厚及審言卒嶠時爲大學士率僚屬友人請加命贈著作卽審言

生子閑閑生甫甫舉進士不第獻賦玄宗使待制集賢館後檢校工部員外郎與李白齊名時號李杜然甫作詩多宗審言而稽古過之

王無競字仲烈東萊人少有文學初應舉下筆成章及第解褐授趙州欒城縣尉歷監察御史轉殿中舊例每日更直於殿前正班時宰相宗楚客楊再思常離班偶語無競前曰朝禮至敬公等大臣不宜輕易以慢恒典楚客等大怒轉無競爲太子舍人神龍初坐訶詆權倖出爲蘇州司馬及張易之等敗以嘗與

王再貶嶺外卒於廣州

帝月將雍州人神龍初以布衣上書告武三思不臣之跡反爲三思所陷中宗命卽加戮時方盛夏給事中徐堅上表救之謂朱夏在辰天道生長非時行戮恐傷和氣君舉必書將何以訓乎上納其言遂令決杖配流嶺表

劉昇彭城人曾祖德威事太宗爲刑部尚書祖審禮事祖母及繼母以孝聞仕至工部尚書禦吐蕃于青海敗沒諸子詣闕請入吐蕃贖父次子岐州司兵易

從奉詔而往則昇之父也比至則審禮已卒易從晝夜泣血吐蕃哀之還其屍易從跣足萬里護屍歸塋朝廷嘉之贈審禮兵部尚書謚曰僖易從後爲彭州長史爲酷吏周興所陷將刑百姓荷其仁恩競解衣投地曰爲長史祈福有司平准直十餘萬易從一門仁孝而橫遇冤酷海內痛之昇時年十餘歲配流嶺表後六道使誅流人昇以言行忠信爲南蠻首領所保持僅而獲免復起爲中書舍人弟晟與昇同流亦得不死後仕至給事中

楊茂謙關中人擢制舉授左拾遺內供奉爲吏介而勤歷秘書郎始竇懷貞雅重其才及執政薦爲大理正左臺御史中丞開元初出爲魏州刺史河北道按察使與司馬張懷玉同鄉長相善洎晚有隙掉訐短長左遷桂州都郡徙廣州卒

賈直言河朔人代宗時父道冲坐洩禁中事帝怒賜鴆酒至門直言白中使請自執器以飲父且給其父曰當謝四方神祇父方拜伏中使少怠因取鴆代飲之立死昏迷而寤明日毒潰自左足洞出父之乃蘇

廣東通志 卷之三十一 任中具
中使具奏帝憐之減父死併直言俱流南海後遇赦
還初直言南行時以妻董氏少乃訣曰生死不可期
吾去汝可亟嫁無需也董氏不答引繩束髮封以帛
使直言署曰非君子不解直言居南海二十年乃還
署帛宛然及湯沐髮墮無餘太和初授絳郡太守自
言始飲鴆酒志在必死岑岑然覺毒汨五內流至肢
節其痛踰於鑽灼摩頂放腫不可名狀旣蘇每遇天
陰則又甚焉軫其腔及足脛色皆如墨其傍攻出六
孔膿液紫瘀臭敗逆槍人鼻達數十步外惟食啖無
減平昔故僅不死爾

竇存亮長安人爲秀才時聞昌黎韓愈名心切慕之
貞元十九年愈以言事黜爲陽山令存亮裹糧數千
里往從之遊明日抵陽山事愈甚謹蓋愈罄竭底裏
與存亮談欲求反自得之爾其後存亮亦有文名
孟雲鄉河南平昌人家于樊口少好學工於詩高古
奧逸不作常語第進士擢校書郎與杜甫元結最相
友善甫服其稽古南海督府招之雲卿遠行結作詩
送之以謂赴魑魅鄉必不可往雲卿堅於行結至南

海從事軍幕更能諳練久之賦苦雨詩有句云安知浮雲外日月不運行遂謝事而去

元集虛河南人少好群籍仕爲協律郎博通三教之說以儒爲主而勦佛老入之南遊愛廬山之勝結亭五老峯下携三子往居焉自稱自稱山人不復出仕白居易結廬其北旦夕往還甚敬愛之與柳宗元韓愈皆交厚其南遊也抵廣州周覽嶺海名勝愈贈之詩宗元作序送之唐自玄宗以來並崇三教嘗召儒臣談論故集虛肄習之其從事南海蓋因嶺南帥府

辟召云

劉言史趙州人與李賀同時所作有詩歌十首嘗遊燕薊王武俊方節制冀方言史造之武俊聞其詩名頗加敬禮嘗與言史獵于郊野武俊先騎雙鴨起於蒲稗間一發聯中武俊懽甚言史馬上草射鴨歌以獻武俊大悅益重言史由是奏請官之詔授棗疆令辭疾不就世重其高稱爲劉棗疆蓋比諸范萊蕪云後辟爲司功掾非其好也乃依遊南海怡情山水有贈北中親友及王園寺避暑諸詩廣人爭傳誦之

楊衡字仲師吳興人初隱廬山工於詩文與符載宋
濟李象齊名有盜其文登第者衡因詰闕亦登第見
其人謝過笑而恕之嘗作詩送孔周之南海謁王尚
書因先容得參幕府又寓嶺南爲節度使李復所重
後官至大理評事竟以事忤後帥而去卒于家

李群玉字文山澧州人好學善書工於詩律裴休觀
察湖南厚延致之大中間詣闕上表語頗訐直宰相
崔鉉進其詩三百篇聲譽大著會休入相首薦之云
群玉放懷丘壑吟詠性情比妍詞於麗則動清律於

風騷冥鴻不歸羽翰自逸霧豹遠跡文采愈奇詔以
處士授弘文館校書郎群玉東歸遂遊嶺外入廣州
訪五僊遺跡往遊蒲澗復登羅浮皆有題詠嘗夢入
黃陵廟恍若有物告以死期潯陽太守段成式志其
事二年後果卒于洪井成式作詩哀之

許渾字用晦睦州人以詩名大中三年任監察御史
嘗祇命南海在廣州多所題詠

陳陶字嵩伯劔浦人隱居南昌之西山學通佛老天
文武宣時以歌詩名嚴宇牧豫章以其操行高潔牢

欲貶之遺小妓蓮花往侍陶殊不顧嘗遊廣州得柑
橙歸種卽多實令山童賣之沒後二種皆不實宋開
寶中人有見之者世傳其得僂云

曹松字夢徵舒州人學賈島爲詩累試不偶南遊廣
州山水勝處必留連累日嘗至西樵栖遲久之教其
民焙茶復至盧垓石咨問處士陳陶舊跡人因改石
爲南箕臺云松後北還舉進士年七十餘

李郢字楚望長安人博學工於詩大中進士屢爲藩
鎮從事終於御史唐末避亂嶺表家廣州以詩自適

子興生於南海尤能詩每一篇成必膾炙人口後登
甲科唐詩之興始自杜審言與沈宋倡爲律詩而審
言之孫甫稱大家其衰也元白以淺易之辭倡爲俗
體而郢及許渾李商隱輩雖欲精琢翻成晚唐至於
咸通以後氣喪而語偷聲煩而調急其衰極矣一代
名家始終寓跡多在五嶺三江間他邦所無也

五代王定保南昌人劉隱據嶺表中朝士人多往依
之辟定保置幕府後隱第龔欲僭號定保不從龔遣
定保使荆南乃建國比歸猶以爲言龔甚憚之出定

保爲寧遠軍節度使大有十三年冬代趙損爲中書侍郎同平章事不踰年卒

趙光喬字煥業京兆奉天人少力學脩行與兄光逢第光胤皆第進士光逢尤規矧自持以中書舍人爲翰林學士時光喬由膳部郎中知制誥對掌內外命書士歆羨之後俱事梁開平二年朱溫以劉隱爲清海靜海節度使遣光喬及右補闕李殷衡克官告使隱皆留之及龔建國稱帝以光喬爲兵部尚書與楊洞潛及殷衡並同平章事後龔召其家屬至自京兆

遂留貫廣州時光逢相梁光胤後相唐莊宗一家三相並出光喬卒漢復以其子相爲相

劉濬字伯深其先滑州胙人伯崇龜節度嶺南父崇望相昭宗濬從崇龜流寓廣州因占籍焉崇龜子岳爲梁翰林學士莊宗滅梁貶岳濬遂不敢北還事南漢王龔爲宗正卿兼工部侍郎乾亨中龔練兵于潮欲以侵閩濬言于楊洞潛力行諫沮龔不聽乃引兵侵民屯於汀漳境上閩人擊之龔敗走而歸大有九年洞潛卒以濬代爲中書侍郎同平章事在位清簡

執持勸糞養民息兵其子孫在廣代有顯者

宋張愈字少愚益州人少俊偉有大志遊學四方屢舉不第寶元初上書言邊事請使契丹令外夷相攻以完中國之勢其論甚壯用使者薦除試秘書省校書郎願以授父忠顯而隱於家丁內艱鹽酪不入口再菴植所持柳枝於墓忽生枝葉後合抱六石不應喜奕棋樂山水遇有興雖數千里輒盡室往遂浮湘沉入九疑觀浙江升羅浮至廣州登城樓題詩見人至拂其姓名而去

蘇軾字子瞻眉山人紹聖中以兵部尚書謫惠經廣州登陟題詠所在而有妙高臺鑿空閣蒲澗寺皆其履跡所及也所製榻巾屏几至今猶倣之新會人以其嘗至石螺岡構亭表之號坡亭云其爲人向慕如此

姚鉉字寶臣廬州合肥人太平興國中進士文辭敏麗尤工書札淳化中直史館應制賦賞花釣魚詩特被嘉賞賜白金褒獎之歷右司諫兩浙轉運使采唐世文章分門編類選爲百卷名曰文粹鉉雋爽尚氣

薛映知杭州與之不協密摺其短以聞於除名貶連
州文學所著文粹慕者建樓貯之卒後其子以書進
詔藏內府命以一官

張浚漢州綿竹人唐丞相九齡第九皐之後紹興乙
丑彗星見欲力論時事以毋計氏年高言必被禍計
氏知之誦其父咸紹聖初對策曰臣寧言而死於斧
鉞不忍不言而負君父浚意遂決卽䟽言當今事勢
如養大疽不決不止遲則禍大而難收疾則禍輕而
易治惟陛下斷之於獨謹察情僞預備倉卒庶幾社

稷安全不然後將噬臍事下三省秦檜大怒令中丞
何若論之以特進提舉江州太平興國宮連州居住
浚在連館濯纓堂嘗登列秀亭眺覽自適構書院於
嘉魚坊後徙永州尋拜相兼樞密使封魏國公

張栻字敬夫浚之子浚以抗䟽貶連州栻從之暇日
登眺有湟川八詠栻頴悟夙成以古聖賢自期仕直
秘閣浚開府治戎栻間以軍事奏孝宗異其對擢左
司員外郎兼侍講召對每以脩身務學畏天恤民爲
言宰相近習皆憚之遷吏部侍郎知江陵府終右文

殿脩撰病且死猶手疏勸帝親君子遠小人信任防
 一已之偏好惡公天下之理帝嗟悼不已朱熹謂黃
 幹曰吾道益孤矣所著論語孟子說太極圖說洙泗
 言仁錄諸葛武侯傳經世紀年行于世學者稱為南
 軒先生後追封華陽伯從祀孔子廟廷

岳飛相州人紹興二年權知潭州兼荆湖東路安撫
 詔招賊曹成成驚曰岳家軍至矣分道而遁飛至茶
 陵詔令察成情為進退飛奉詔招成不聽乃疏陳比
 年多命招安故盜強則肆暴弱則就招苟不大懲四

方蠡起訐之飛入賀州境得成謀者縛置帳下飛出
 調兵食吏曰糧盡矣柰何飛陽曰姑反茶陵陰令逸
 謀謀歸告成成大喜期翌日追之飛命士蓐食夜趨
 遶嶺未明至太平場破其砦成據險相拒飛麾兵掩
 賊大潰成走據北藏嶺遣將迎戰飛不陣而鼓士爭
 奮勇奪二隘據之成督衆十萬守蓬頭嶺今改順頭嶺下有岳
 廟公飛一鼓登嶺破其衆成奔潰飛謂偏裨曰成衆已
 散追殺之則脅從者可憫縱之則復聚為盜今遣若
 等誅其首而撫之慎勿妄殺於是張憲自賀連徐慶

自邵道王貴自柳桂招降二萬餘人與飛會連州

杜純字孝錫濮州甄城人少女心人之操伯父沒官

南海上其孤弱樞不能還純白赴請往如期而喪至

鄉黨義之以廕至權兵部侍郎

陳與義字去非洛陽人天資卓偉童時能文嘗賦墨

梅詩徽宗嘉賞之政和中上舍甲科累遷符寶郎謫

監陳留酒稅及金人入汴高宗南遷遂避亂襄漢轉

湖湘踰嶺嶠寓廣州登海山樓題詠而去

折彥質字仲古紹興六年僉書樞密院事忤秦檜為

所排謫昌化軍寓至廣州寓開元萬壽寺鑿井得泉

甚美人號折公井後移柳二十五年復官

陳顯字德明初為河南固始人元豐中進士歷戶部

尚書崇寧改元政和二年因召對力言再用蔡京士

民失望帝怒貶知越州遂隱于四明五年召起為宣

和殿學士辭不就靖康之亂避地南海因家焉

文應古八人丞相文天祥從孫側儻尚志節景定

中丞祖弟璧守惠州應麟與之偕屢勸璧脩城堞建

樓櫓積芻芻爰糧儲以嚴守備璧易其言及元兵至竟

以城降應麟恥之携二子起南遁于東莞之東渚遂家焉今其子孫日蕃爲名族

元趙憲昭筠州人至順中累官西臺侍御史以直諫馳聲朝署會禁漢人南人不得蓄兵器犯者論死乃上疏言天生五材誰能去兵苟以南北異視人人疑懼爲變非小忤虜君臣意後至三年詔安置廣州行至南雄卒子從簡入廣留家南海以保障功官至宣慰副使

國朝江朝宗字東之巴縣人景泰辛未進士累官至

侍讀學士與副都御中牟俸連姻太監汪直巡邊時俸巡撫遼東直以贓罪逮俸因及朝宗朝宗不敢辯竟調廣東鹽課提舉亦以文名聞于一時後入覲遂乞歸

黃諫字廷臣臨洮蘭州人博學多藝工隸篆行草而尤長於八分書正統壬戌進士及第第三人授編脩天順初改尚寶司卿兼侍講出使安南詰迂路定禮儀辦坐席辭餽驢諭請正朔凡爲書十一通悉按經史其王皆不敢違風節凜然交人至今稱之還遷翰

林院學士嘗作金城黃河二賦李賢劉定之輩皆稱美之好評品泉水自郊畿論之玉泉爲第一自京城論之文華殿東大庖厨井爲第一作京師水記每進講退食內府必啜厨井水所烹茶比衆過多或初寒暑雨罷講則連飲數杯曰暫與汝辭衆皆譁然一咲談者以爲嘉話忠國公石亨事敗以鄉人出入其門被劾謫廣州通判至廣每遨遊白雲蒲澗諸山水亦評廣州泉水以鷄爬井爲第一更名學士泉鐫題名勝多作八分書廣人多從之遊後召還卒于南雄

繙字大紳吉水人洪武戊辰進士選庶吉士上封事論時政侃侃萬言高皇帝奇之兵部尚書沈潛忌其年少受知改繙御史蓋遠之也嘗爲王國用夏長文作疏詹徽衣泰惡之復時進直言竟坐深文得罪上憐其才召對便殿賜鏹慰之曰汝歸讀書十年復來尋命繙脩正元史踵成宋書刪定禮經凡皆留中家居八年上崩來奔喪爲有司所論謫河州衛吏建文元年召翰林待詔永樂初召繙備顧問累遷侍講學士與胡儼楊榮輩並直文淵閣預

務 上寵信縉賞賚等六卿儲位未定 上密詢

之縉稱世子仁孝太孫英特明年立東宮進翰林學

士煎着坊大學士初議頗洩高煦不恨欲殺縉未幾

交趾用兵解疏諫 上不悅遂踈之出為廣西叅議

一廣東遍遊名山淹留浹旬嘗至西樵題廖謹讀書

處李至剛劾其怨望恣遊改交山八年入奏事南都

值 上比征高煦誣其罪 上出塞輒遠觀儲君徑

無人臣位 上怒逮縉及至下獄十三年卒獄中

洪熙元年官六子積中書舍人

增補

李承箕字世卿湖廣嘉魚人成化乙酉舉于鄉弘治

元年至新會從陳獻章遊獻章築楚雲臺居之時與

之投壺雅歌甚懼也所為文詩尤清拔吳廷舉延之

脩順德志後歸卜築黃公山遂不復出兄大理評事

承芳亦謝政同隱弟承勛為吏部尚書有時名

論曰冲曠之士遠廬天地逆旅吾生視六合內何

壤非菟裘即天涯流滯詎曰境非吾土而邑邑生

鄉國思乎况廣山川露竒呈秀在在怡神名賢逋

客一經其地多繼繼而不能去乃車塵馬跡山川

亦藉以重後或冒其姓名如韓岩坡亭是已夫仲
翔見放講學不輟思光逢難吟咏自如達者不當
如是耶武穆敬夫一駐桂陽至今俎豆何賢者令
人豔慕一至此也王叔之杜審言輩雖止詞流然
雲藻瑤篇先後輝映幽岩浚谷藉耀光明則騷人
固名勝助乎彼徘徊虞園躑躅哀咽者隕真于憂
患之途蓋未聞道也以其躔直取踈吾憫而存焉
噫士之齟齬于世若樓玄者亦何可勝道哉

廣東通志卷之二十二

